

ԶԻՆՈՒՐԱԿԱՆ ՕՐԵՆՍԴՐԱԿԱՆ ՄՇԱԿՈՅԹԸ ՀԱՅ ԻՐԱԻՈՒՆՔԻ ԱՂԲԻՒՐՆԵՐՈՒՄ

Արցախեան ապրիլեան հերոսամարտի օրերին օրինաչափ ու հրատապ դարձաւ պատերազմի եւ խաղաղութեան համընդհանուր հիմնահարցի վերաիմաստաւորումը՝ ազգային-պատմական, փիլիսոփայական, իրաւական, ռազմագիտական, քաղաքական, դիւանագիտական եւ այլ դիտանկիւններից։ Ի հակադրութիւն թուրքադրբեջաննական հափշտակիչ, ցեղասպան քաղաքականութեան ու բարբարոսութեան՝ հայ պաշտօնական եւ հասարակական շրջանակներում առաւել կարեւորուում են ազգային ինքնորոշման, պետական անվտանգութեան, Հայաստանի սահմանների անխախտելիութեան սկզբունքները՝ հաշուի առնելով խնդրի լուծման ոչ միայն ռազմաքաղաքական, այլև քաղաքակրթական-մարդասիրական գործօնները։ Այս համատեքստում արդիական է մարդու գործօնի փաստարկումը՝ հայ իրաւունքի աղքիւրներում սահմանուած զինուորական օրէնքներում։

Հայ իրաւունքի պատմութիւնը ազգի մշակութային-քաղաքակրթական պատմութեան կարեւոր բաղադրիչներից է։ Հայրենիքի ռազմաքաղաքական պաշտպանութեան, պետութեան եւ ազգի անվտանգութեան, ազատութեան ու անկախութեան գաղափարներն արտացոլուել են դեռևս հայ սովորութային իրաւունքում, Հնագոյն արձանագրութիւններում, թագաւորական հրամանագրերում, զօրանամակներում ու նախարարական իրաւակարգերում։ Սպարապետութիւնը միշտ համարուել է հայոց պետութեան կառավարման համակարգի կենտրոնական գերատեսչութիւններից մէկը, որն իրականացրել է երկրի զինուած ուժերի կազմակերպման եւ պատերազմի ժամանակ ղեկավարման գործառոյթներ։ Պետականութեան կորստից (428 թուականից) յետոյ Հայաստանում իրաւայարաբերութիւնները կարգաւորուել են նախարարական իրաւունքի կանոններով, աւելի ուշ՝ նաեւ «կանոնագիրք Հայոց» ժողովածուի սահմանադրոյթներով։ Թէ՛ նախարա-

բական իրաւունքը, թէ՛ կանոնական իրաւունքը նշանակալի դեռ են ունեցել՝ պահպանելու ազգի կեցութային հիմքերը եւ զարդացնելու հայոց ինքնակառավարման ունակութիւնն ու իրաւական միտքը: Իրաւական այս մշակոյթը դարձել է նաեւ աշխարհիկ գրաւոր օրէնսդրութեան հիմք:

Հայ ժողովրդի իրաւագիտացութիւնն այնքան բարձր է եղել, որ զգացել է աշխարհիկ-քաղաքական ու զինուորական օրէնքների անհրաժեշտութիւնը՝ յանուն ազգային-դատավարական ինքնութեան: Յայտնի է, որ մահմեդական տիրակալները քրիստոնեաների ներքին գործերը չէին քննում իրենց օրէնսդրութեամբ: Ներսէս Լամբրոնացու վկայութեամբ՝ Ամենայն Հայոց Կաթողիկոս Գրիգոր Դ. Տղայի (1173-1193) օրօք քաղաքների ու գաւառների բնակիչները նորին Սրբազնութիւնից աշխարհիկ օրէնքներ խընդրեցին, սակայն ո՛չ եկեղեցիներում, ո՛չ էլ իշխանների մօտ, չգտնուեցին այդպիսի օրէնքներ, «...բայց միայն զկանոնական»՝ որ ի սուրբ հարցն ժաղովներու էր գրեալ... Խսկ քաղաքի աւրէնս ոչ գտաւ ի մէջ Հայոց¹: Կաթողիկոսական պահոցներում եղել են միայն կանոնական օրէնքներ: Միիթար Գօշի, Ներսէս Շնորհալու, Ներսէս Լամբրոնացու, Սմբատ Սպարապետի ջանքերով ստեղծուեցին Հայ իրաւունքի նոր աղքատլուներ, ինչպէս նաեւ փոխառուեցին ու ստեղծագործաբար վերախմբագրուեցին օտար որոշ օրէնսգրքեր՝ դրանք յարմարեցուելով հայոց երկրի առանձնայատկութիւններին, ազգային-քաղաքական ու ուազմական պահանջներին:

Միջնադարի հայ իրաւագէտների օրէնսդրական գործունէ-ութեան հիմքում հայաստանի ինքնիշխան, կենտրոնացուած պետականութեան գաղափարն էր, որի իրականացումը ենթադրում էր մի շարք հիմնահարցերի լուծում: Ներազգային ուժերի համախմբում, կազմալուծուած զինուած ուժերի միաւորում, ազգային բանակի վերաստեղծում, տեղական իշխանութիւնների համագործակցում, անջատողական-կենտրոնախոյս քաղաքականութեան չէ-զոքացում, ընկերային ներդաշնակութեան հաստատում, հոգեւորբարյական գաղափարախօսութեան ծաւալում եւ այլն: Հայ մտածողները մշակել են ազգի ինքնիշխանութեան եւ պետութեան ինքնիշխանութեան (ազգային իշխանութեան գերակայութեան) ուղոյն հայեցակարգ, որ համապատասխանում էր հայ ժողովրդի

¹ Քաղաքային Օրէնք ներսիսի Լամբրոնացւոյ ըստ Կոստանդիանոսի, Թէոդոսի եւ Լեոնի քագաւորաց Հռովմայեցւոց, ի «Բանասէր», Փարիզ 1907, 5:

ազգային-ազատագրական պայքարի արդարացիութիւնը հիմնաւորող ազգային գաղափարախօսութեանը:

Աստուածաբան-փիլիսոփիայ, օրէնսգէտ, եկեղեցական-քաղաքական գործիչ Մխիթար Գօնի (շ. 1120-1213) «Գիրք Դատաստանի»² («Դատաստանագիրք Հայոց», 1184) աշխատութիւնն աշխարհի հանրաճանաչ օրէնսդրական յուշարձաններից է: Գօշի իրաւունքի փիլիսոփայութեան ելակէտը մարդու հիմնախնդիրն է, գլխաւոր սկզբունքները՝ արդարադատութիւնն ու խիստ օրէնքների մարդկայնացումը: Հէնց Դատաստանագրքի Նախադրութեան մէջ հաստատելով, որ «...արդարն ընտրելն ի սկզբանէ քնական յատկանիշ է մեզանում»³, նա յիշեցնում է որ Աւետարանը բնական ու Մովսիսական օրէնքների լրացումն է եւ առաւել է, քան Օրէնքը: Ուստի՝ բաւարար է, որ «Օրէնքներն ու Աւետարանը որպէս սերմ լինեն մեր հոգիներում, ոքնցով եւ դատարանում արժանի դատեր վարենք»⁴:

Այդպէս՝ դրական (մարդկային) օրէնսդրութեան նկատմամբ աստուածային ու քնական օրէնքների եւ քրիստոնէական սկզբունքների գերակայութեան ընդգծումը Գօշի հայեցակարգում գիտամեթոդական կարեւոր հենք է՝ հակադրուելու եւ քննադատելու օտար օրէնսդրութիւնները, աստուածային կամքից բխեցնելու ազգային օրինաստեղծման անհրաժեշտութիւնը եւ պաշտպանելու ազգային իրաւունքները: Նա շեշտում է նաեւ օրէնքների դաստիարակչական նշանակութիւնը՝ կարեւորելով այն փաստը, որ աշխարհիկ կանոնները, ինչպէս աստուածային օրէնքները, «...նպատակ ունեն ազատել մարդկանց մեղքներից... խափանելու չարը, որպէսզի համամտութեամբ եւ համակրանքով ապրենեմ միմեանց հետ»⁵:

Դատաստանագրքի ստեղծումը պայմանաւորուած էր տուեալ պատմաշրջանի հրամայական պահանջով: Բուն Հայաստանում եւ Կիլիկիայում հայ ժողովուրդը մղում էր ազգային-ազատագրական պայքար՝ յանուն քաղաքական անկախութեան ու պետականութեան վերականգնման: Մ. Գօշի գլխաւոր նպատակն էր՝

2 Մխիթար Գօն, Գիրք Դատաստանի, ԹՈՐՈՍԵԱՆԻ, Խ., (աշխտ.), Երևան 1975:

3 ԱԻԱԳԵԱՆ Ռ., Հայ իրաւական մտքի գանձարան, Թաւելուած X, Մխիթար Գօշի «Դատաստանագիրք Հայոցը», Երևան 2001, 360:

4 Անդ, 361:

5 Անդ, 366:

ազգային գաղափարախօսութեամբ սատարել հայ ժողովրդի ազատագրական պայքարին եւ իրաւական հիմք նախապատրաստել պետականութեան լինելիութեան համար։ Միտուած լինելով համազգային շահերին՝ Դատաստանագիրքը նպաստում էր հայ ժողովրդի ինքնապահպանման ու քաղաքական ինքնորոշման գործին։

Գօշը երկրի անկախութիւնը պատկերացնում էր ուժեղ, ինքնիշխան պետականութեամբ, որ կապւում էր պետութեան գլխի՝ թագաւորի անձի հետ։ Թէեւ նա սահմանում է թագաւորի՝ որպէս գերիշխանի բացառիկ իրաւունքները, բայցեւ կարեւորում է նրա մարդկային-հումանիստական որակները՝ կոչ անելով զերծ մնալ բռնութիւններից ոչ միայն հայերի, այլև օտարազգի անձանց նկատմամբ։ Մասնաւորապէս՝ Դատաստանագրքում պատուիրում է, որ այլազգիների հետ պատերազմի աւարտից յետոյ թագաւորը «...սպանութիւններ չանի, այլ միայն պատերազմի պատճառ» [հանդիսացող] այլազգիներին [սպանի]։ Եթէ օտար երկիր պաշարի, պէտք է «...նախ խաղաղութեան կոչ անի մէկ, երկու, երեք անգամ», բայց եթէ դիմադրութիւն լինի, «...դիմադրներին սպաննելով՝ միւսներին հարկատու դարձնի։ Խսկ եթէ անձնատուր լինեն՝ այլ բաներով հարկատու լինեն, բայց ո՛չ գլխով»⁶։

Հստ օրէնքի՝ պետութեան եւ իշխանութեան դէմ ծանրագոյն յանցագործութիւն են համարում դաւաճանութիւնը, լրտեսութիւնը, քաղաքներն ու բերդերը թշնամուն յանձնելը, մատնութիւնը։ Նման դէպքերում Գօշը սահմանում է մահապատիժ, եթէ յանցագործն այլազգի է, եւ յանցանքն ապացուցուած է։ Նա թագաւորին իրաւունք է վերապահում սպաննելու կամ ներելու իր հայեցողութեամբ։ «Եթէ յարմար գտնի [մատնողի] անձը պահպանել՝ [նրա] կմոցն ու զաւակներին արքունիք վերցնելով՝ վաճառի եւ ժառանգութիւնից զրկի, որպէսզի ակնառու խրատ լինի»։ Քրիստոնեաների համար եւս նախատեսուած է մահապատիժ։ Բայց այս պարագայում նա թագաւորին յորդորում է. «...յանուն մեր օրէնքների մարդասիրութեան խրատի այս կամ այն ձեւով, որպէսզի ապաշխարութեան հասնի եւ չկորչի՝ [անկախ նրանից] ի կատար ածուել է չարութիւնը, թէ ոչ (ընդգծումը - L.U.)»⁷։ Այդպէս՝ բարձրագոյն պատիժ սահմանելով պետութեան դէմ յանցագործու-

6 Անդ, 394:

7 Անդ:

թիւնների դէպքում՝ Գօշը միաժամանակ թագաւորից ներողամտութիւն է հայցում, յատկապէս՝ քրիստոնեանների համար:

Հասկանալով, որ Հայաստանի քաղաքական վիճակի պատճառներից են երկրի զինուած ուժերի ցրուածութիւնն ու իշխանների՝ իրենց գաւառներում ներփակուելը, Գօշը քննադատում է այն իշխաններին, ովքեր անջատամտութեամբ «...լաւ համարէին ի սորկութեան կալ ամենայն ազգաց, քան քէ հենազանդել միմեանց եւ կեալ յազատութեան»⁸: Նա փորձում էր իրաւական հարթութեան վրայ լուծել իշխանների կենտրոնախոյս ձգտումները չդոքացնելու խնդիրը, ինչն այդ ժամանակ հնարաւոր էր միայն ստորակարգութեան սկզբունքով: Օրինակ՝ պատերազմի ժամանակ գլխաւոր աւարը՝ ոսկին, արքայինն է, իսկ «...արծաթը իշխաններին լինի, պղինձը, երկաթը եւ այն՝ զօրքին»: Գեղինների ու աւարի կէսը թագաւորինն է, «...միւս կէսը՝ զօրքինն է»: Թագաւորն ու իշխանները պարտաւոր են տասանորդ տալ եկեղեցուն⁹:

Հստ Դատաստանագրքի՝ թագաւորի իշխանութիւնն անսահմանափակ չէ, եւ նրա անձը նոյնպէս դատապարտելի է օրէնքներով: «Եթէ անիրածեշտ լինի թագաւորին պատժել՝ երկրի խաղաղութեան պահպանման համար, պէտք է դա արուի մէկ այլ թագաւորի եւ հայրապետի կամքով ու ամենայն արդարութեամբ»: Գօշը գահընկեցութեան իրաւունք ժողովրդի համար չի սահմանում, ինչն այդ ժամանակ կարող էր յանգեցնել ներազգային խոռովութիւնների, իսկ նրա նպատակը ազգային միասնութեան հաստատումն էր: Բայցեւ չի ընդունում անօրինական դատաստանները: Հստ օրէնքի՝ ազատներն իրաւունք չունեն պատժել զինուորներին, քանզի «...պատժելը իշխանների իրաւասութիւնն է»: Նմանապէս՝ «...զինուորներն իրաւունք չունեն գիւղացիներին ախորել կամ պատժել. ախորել կարող են ազնուականները, պատժել՝ իշխանները»¹⁰: Հետեւաբար՝ արգելում են զինուորների բռնութիւնները եւ կամայական պատիժները խաղաղ բնակչութեան շրջանակներում:

Գօշի Դատաստանագրքում պատերազմին ու զինուորական ծառայութեանն առնչւում են նաեւ ընտանեկան եւ քրէական իրաւունքի մի շարք կանոններ: Օրինակ՝ եթէ ամուսինը պատերազմի

8 Հայոց Առք վկաները, ՄԱՆԱՆԴԵԱՆ, Հ. - ԱՃԱՌԵԱՆ, Հ., (աշխտ.), Վաղարշապատ 1903, 24:

9 ԱԻԱԳԵԱՆ Ռ., նշ. աշխ., 395-396:

10 Անդ, 514:

մասնակից է, կինն իրաւունք չունի ամուսնանալ: Նոյնիսկ ամուսնու մահուան լուրը ստանալուց եւ այն ստուգելուց յետոյ կինը պէտք է սպասի եօթ տարի, ապա «...համոզուած ամուսնու մահուան [իսկութեամբ]՝ ամուսնանայ, եւ եթէ ամուսինը վերադառնայ՝ չառնի կնոջը»:**Այս դէպքում կրկին ամուսնութեան իրաւունք ունի միայն կինը, իսկ «...վերադարձած ամուսինը չունի նոր պակի իրաւունք»¹¹:** Եօթ տարուայ սպասման պայմանը վերաբերում է նաեւ գերութեան մէջ գտնուող զուգակցի ամուսնուն: Եթէ կինն է գերութեան տարուել, պէտք է փրկագնուի ամուսնու եւ ծնողների կողմից: Բայց եթէ եօթնամեայ ժամկէտը լրանալուց յետոյ գերուածը (կինը կամ ամուսինը) չի վերադառնում կամ ազատուում փրկագնով, դադարում է ամուսնական կապը, եւ սպասողը իրաւունք ունի կրկին ամուսնանալ¹²:

Հարկ է նշել, որ եօթ տարուայ սպասման պայմանը կանոնական է, այն սահմանուել է Դուինի Դ. ժողովում (645): Հստ է. կանոնի՝ անօրինական է հայոց աշխարհի թշնամիներից գերուած կանանց կամ տղամարդկանց ամուսինների կրկնամուսնութիւնը՝ «...առանց վարդապետին հրամանի»: Այդ անօրէնների համար սահմանում է. «...յառաջ քան զէ. ամն (7 տարի - Լ.Ա.) մինչ զուգակիցն ի գերութեան էր եւ նոքա յանդգնութեամբ այլ ամուսին առին, այնպիսեացն ամուսնութիւնն ի պոռնկութիւն է. ե՛ւ գան ե՛ւ պատուհան կրեսցեն»: **Որպէս պատիք՝ նախատեսում են մեղաւորների ունեցուածքի բռնագրաւում եւ աղքատներին բաշխում, ինչպէս նաեւ եօթ տարի ապաշխարում:** Իսկ ովքեր համբերում են եօթ տարի, եւ ամուսինները չեն վերադառնում, կարող են ամուսնանալ՝ «...առանց տուգաննի եւ պատուհասի, եւ կրկին ապաշխարութիւն ի վերայ եղիցի»¹³:

Քրէական իրաւանկանոններում մեկնաբանելով մեղի տեսակները՝ Գօշը բացատրում է, որ «...պատերազմի մէջ սպանութիւններ կատարում են ե՛ւ կամաւոր, ե՛ւ ակամայ»: **Օրինակ՝ երբ մէկը մթութեան մէջ կարծում է, թէ թշնամու է հարուածում,** բայց զարկելով սպանում է իր բարեկամին: **Սա «խառը» սպանութիւն է՝ կատարուած ե՛ւ կամաւոր, ե՛ւ ակամայ:** **Դիտաւորեալ է, որովհետեւ կամենում էր սպանել թշնամուն, ակամայ, քանզի չիմանալով՝ սպանեց բարեկամին:** Կամ՝ «Եթէ մէկը նետ է արձա-

11 Անդ, 408:

12 Անդ, 405:

13 ՅԱԿՈԲԵԱՆ, Վ., (աշխտ.), Կամոնագիրք Հայոց, Կամոնք Դրւմայ Սուրբ Ժողովայի, Կամոն է, Խո. Բ., Երևան 1971, 206:

կում, որ քշնամում պատահելով՝ սպանում է նրան. այս սպանութիւնը կամաւոր է ու նաև ակամայ»¹⁴: Նման դէպքերում, ինչպէս ինքնապաշտպանութեան ժամանակ թշնամուն վնասազերծելիս խիստ պատիժներ չեն սահմանում, բայց պարտադիր է ապաշխարանքը՝ յանուն հոգու մաքրագործման:

Այդպէս՝ Գօշը հնարաւորինս մեղմացնում էր պատիժները՝ ըստ կատարուած յանցագործութեան ծանրութեան աստիճանի, բայց խիստ դատապարտում էր մահմեղականենքին՝ հայերի նկատմամբ բռնութիւնների պատճառով:

Զինուրական օրէնսդրական մշակոյթն արտացոլուած է նաև աստուածաբան, փիլիսոփայ, բանաստեղծ, եկեղեցական-քաղաքական գործիչ ՆերՍէՍ ՇնՈՒՀԱԼԻՒ (Ներսէս Դ. Կլայնցի, 1101/1102-1173) «Թուղթ Ընդհանրական»ում: 1166 Ապրիլի 17ին ընտրուելով Ամենայն Հայոց Կաթողիկոս՝ Շնորհալին իր հայրապետական գործունէութիւնը սկսեց ողջ Հայ ազգին յղուած գրաւոր խօսքով: Դա ներսէսի առաջին կոնդակն է¹⁵, որը հոգեւոր-բարոյական, իրաւական ու ռազմաքաղաքական նշանակութեամբ արժեւորուել է որպէս ինքնատիպ աշխատութիւն:

«Թուղթ Ընդհանրական»ում սահմանուած խրատականոնների հիմքում ազգի ինքնիշխանութեան, կենտրոնացուած պետականութեան, մարդու կամքի ազատութեան, քնական իրաւունքների անօտարելիութեան եւ բարոյական կատարելագործման գաղափարներն են: Աշխատութեան «Նախարան»ում Շնորհալին դիմում է ողջ աշխարհի հայերին՝ խնդրելով «...քանալ զականց մտաց ձերոց յունկնդրութիւն աստուածային բանից այսոցիկ... որպէս զի առաջնորդեալ մեսի ի շատիս արդարութեան՝ արժանի եղիցի իւրաքանչիւր ո՛վ ի ձենց՝ միոյ օթեւանաց տան Հօրն երկնաւորի լինել ժառանգաւոր»¹⁶: Հստ նրա՝ հասարակութեան մէջ արմատաւորուած չարիք-ները պայմանաւորուած են Հայ ազգի քաղաքական կեցութեամբ՝ «քազմիշխանութեամբ», կենտրոնացուած իշխանութեան բացակայութեամբ. «Եւ քանակ քագաւորական եւ բազմաժողով ոչ գոյ ազգի մերում, որպէս զի անդանօր նատելով յաքոն հայրապետութեան... ուսուցանեաֆ ժողովրդեան մերում զաստուածային պատուիրանս ըստ առաջին հայրապետաց»¹⁷,

14 Ա.Ի.ԱԳԵԱՆ Ռ., Յշ. աշխ., 518:

15 Թուղթ Ընդհանրական Տ. Ներսէսի Կաթողիկոսի Հայոց, ի տպարանի Առաքելական Աթոռոյ Սրբոյ Յակովիքեանց, Երևանի 1871, 1-83:

16 Անդ, 2:

17 Անդ, 6-7:

«Թուղթ Ընդհանրականի» վեցերորդ գլխի խրատականոն-ներն ուղղուած են զինուորների դասին։ Զինուորականութիւնը ժԲ. դարում յարգուած ու արտօնեալ դաս էր եւ հասարակական-քաղաքական կեանքում ունէր կարեւոր դեր։ Զինուորները են-թակայ էին ազգային իշխանութեան, ուստի՝ պէտք է հնազան-դուէին նրան։ Այնուհանդերձ՝ գաւառների եւ զօրքերի տէր իշ-խաններին Շնորհալին պատուիրում է առանձնակի ուշադիր լինել երկրի պահապան-զինուորների նկատմամբ, չնուազեցնել նրանց թոշակը, քանզի մեծ անիրաւութիւն է դա՝ նրանց «քափած ա-րեան համար»։ Բացառել բռնութիւնները զինուորների հանդէպ, որպէսզի պատիժ կրելու վախից չփախչեն, այլ «...հաւատարմու-թեամբ ծառայեսցեն ձեզ եւ առանց նենգութեան»¹⁸։ Նա պաշտպանում է տիրողից զինուորների հեռանալու իրաւունքը՝ իշխաններին յորդորելով նրանց համոզել ծառայել կամովի եւ ոչ պարտա-դրանքով։

Միաժամանակ օրէնսդէտը զինուորներին յորդորում է ազ-նուորէն ու արիաբար ծառայել՝ պատուիրելով չմոռանալ մարդա-սիրական սկզբունքները։ «Մի՛ առ ականէ ծառայել որպէս մարդահա-նոյք, այլ միամտութեամբ սրտի՛ որպէս Աստուծոյ»։ Հաւատարիմ ծառայելիս զինուորները հատուցւում են, իսկ տիրոջ անձի, նրա ամրոցի կամ ունեցուածքի նկատմամբ ունաճդութեան դէպքում, ինչն անարգանք է Աստծոյ դէմ, «...յԱստուծոյ ընդունելոց է զվրէժ հատուցման չարեաց իւրոց»¹⁹։ Քրիստոնեայ իշխաններին՝ զինուորները պարտաւոր են անվերապահ հաւատարմութեամբ ու սիրով նուիրուել։ Իսկ եթէ «ի քրիստոնէից ով ընդ այլազգւոյ է իշխա-նութեամբ, եւ ի նորին պարգեւաց կերակրի եւ զգենու, նոյն հաւատար-մութիւն պարտ է ցուցանել նմա, եւ զառանց նենգութեան ծառայու-թիւն»²⁰, Զինուորները նաեւ պարտաւոր են արդարութեամբ ու ի-րաւացի վարուել հնազանդ հպատակների հետ, բռնութիւնների ու կտտանքների չենթարկեն նրանց՝ «օրինօֆ դահնաց»։

Հստ Շնորհալու՝ զինուորութիւնը պատճառ չէ՝ արիամարիե-լու Աստծոյ պատուիրաները, անհնազանդ լինելու հոգեւոր ա-ռաջնորդներին, ովքեր յորդորում են. պահպանել սուրբ կանոն-ներն ու աւանդոյթները, չկողոպտել աղքատներին, «անմեղ ա-րիւն» չհեղել։ Քանզի եթէ պատերազմի ժամանակ սպանութիւն-

18 Ա.Աղ, 75:

19 Ա.Աղ, 77:

20 Ա.Աղ, 77-78:

ները թագաւորի հրամանով են լինում, ու դրանց պատասխանատուն նա է, ապա խաղաղ բնակչութեան դէմ գործած բոլոր մեղքերի համար պատասխանատու են զինուորները։ Այս դէպքում «ամեննեցուն համարս պահանջելոյ է ի ձենջ Աստուած՝ ծանր եւ անաշատ դատաստանաւ»²¹։ Մտածողը պատուիրում է զինուորներին. «առաւել քան մարմնական զինուուք՝ հաւատոյ զինովն վառեցարուք», այսինքն՝ սպառագինուել աղօք-քով, աստուածապաշտութեամբ, արդարութեամբ եւ հանդուրժողութեամբ, «որպէս զի Աստուած լիցի ախոյեան ի պատերազմունսն, եւ գթնամիսն վանեսցէ առաջի ձեր»²²։

Այդպէս՝ Ներսէս Շնորհալին, հռչակելով երկրի ռազմական պաշտպանութիւնն իրականացնող զինուորների իրաւունքները, նրանց յորդորում է հայրենիքին ծառայել աստուածային օրէնքների ու մարդասիրական սկզբունքների համաձայն։

Բացի ազգային օրէնսդրական գործընթացից, հայ գործիչները փոխառել ու թարգմանաբար գործադրել են օտար որոշ օրէնսդրքեր, այդ թւում՝ զինուորական կանոններ։ Այս առումով նշանակալի է Կիլիկեան Հայկական պետութեան եկեղեցականքաղաքական ականաւոր գործիչ, փիլիսոփայ, իրաւագէտ ՆԵՐՍԻՍ ԼԱՄԲՐՈՆԱՑԻ (1153-1198) գործունէութիւնը։

Ելնելով հայոց թագաւորութեան վերականգնման եւ ազգային բանակի կայացման նպատակներից՝ Լամբրոնացին, ինչպէս Մ. Գօշը, ժամանակի առաջնային խնդիրներից էր համարում օրէնսդրքերի ստեղծումը։ Բայց եթէ վերջինս ստեղծեց ազգային Դատաստանագիրք, Լամբրոնացին գերադասեց թարգմանել ու հայ իրականութեամբ համապատասխան՝ խմբագրել յունա-թիզանդական օրէնքների ժողովածուները, այդ թւում՝ «Զինուորական օրէնքները» (1196)։ Այս իրողութիւնը վկայում է հէնց ինքը՝ թարգմանիչ-օրէնսդիրը. «Ի հելլէնացւոց գրոց արարի թարգմանութիւն մովկսիսական աւրինացդ եւ լէոնի եւ Կոստանդեայ աւրինացդ, ի նմանէ թարգմանեցի եւ զգինուորական աւրինեդ. եւ ընծայեցի որոց սիրենն վարիլ սովա եւ հանոյ գտանիլ Աստուծոյ, եւ կառավարիչ՝ քաղաքաց եւ գաւառաց»²³։

Հստ Լամբրոնացու՝ պէտք է ժամանակի գործօնը հաշուի առնելով գնահատել իրադարձութիւններն ու օրէնքները։ Այս

21 Անդ, 78:

22 Անդ, 79:

23 Քաղաքային Օրէնք Ներսիսի Լամբրոնացւոյ ըստ Կոստանդիանոսի, թէոդոսի եւ Լեռնի թագաւորաց Հոռվմայեցւոց, Փարիզ 1907, 5:

մեկնակէտից նա խաղաղութիւնը գերադասում է պատերազմից՝ բացատրելով, որ խաղաղութեան սկզբունքը կիրառելի է միայն այն պետութիւնների նկատմամբ, որոնք նոյնպէս ձգտում են խաղաղութեան: Միջպէտական յարաբերութիւններում խաղաղութեան խաղաքականութիւնը գերազոյն արժեք է և օրէնք: Բայց եթէ թշնամական պետութիւնները խախտում են այս օրէնքը, անհրաժեշտ է պատերազմել: Այդպէս՝ Համբրոնացին պաշտպանում է արդարացի պատերազմի սկզբունքը՝ յանուն ինքնապաշտպանութեան:

«Զինուորական օրէնքների»²⁴ ժողովածուն բաղկացած է 57 յօդուածից: օրէնքները կիրառուել են Հին Հռոմում, աւելի ուշ՝ ներառուելով Յուստինիանոսի 533ին հրապարակած օրէնքների ժողովածուի մէջ («Դիգեստներ», Գիրք 49, 16-18 տիտղոսներ՝ զինուորական գործի մասին)²⁵: Հ.-Թ. դարերին զինուորական օրէնքները կազմել են «Էկլոգայի»²⁶ երրորդ յաւելուածը եւ կիրառուել ոչ միայն Բիւզանդիայում, այլեւ Կիլիկիայում մինչեւ հայկական պետականութեան կազմաւորումը:

Զինուորական օրէնքները Համբրոնացին թարգմանել է յունարէն բնագրից՝ նպատակ ունենալով ստեղծել հայոց պետութեան բանակին անհրաժեշտ զինուորական սահմանադրութիւն: Այն գործադրուել է Լեւոն Բ. թագաւորի հաւանութեամբ: Կիլիկեան Հայաստանում զինուորական օրէնսգիրքը կարգաւորում էր զինուորական ծառայութիւնը՝ սահմանելով ծառայութեան ժամկետը, հրամանատարական կազմը, գօրամիաւորումների տեսակները, զինծառայողների իրաւունքներն ու պարտականութիւնները: Օրէնսգրքում առկայ են քրէակիրաւական բազում կանոններ, որոնցում դատապարտում են զինուորների օրինախախտումները (դատաճանութիւն, լրտեսութիւն, զինուորական գաղտնիքի հրա-

24 Զինուորական Օրէնք Ներսիսի Համբրոնացւոյ, ի Բանասէր, Պարիս 1902, թիւ 11, 321-328: Աշխարհաբար քարգմ. տես՝ ՆԵՐՍԻՍ ԼԱՄԲՐՈՆԱՑԻ, Զինուորական Օրէնք, ՄԿՐՏՉԵՍՆ, Վ., (քրգ.), ի Հայ իրաւական մտքի յուշարձամմեր, Գիրք IV, Երեւան 2009, 60-68:

25 ՍԱՖԱՐԵՍՆ Գ., իրաւումի պատմութեան եւ տեսութեան հիմնահարցեր, Երեւան 2010, 349:

26 Էկլոգա (յուն.՝ ծաղկաքաղ) յունա-քիւզանդական օրէնքների ժողովածու է՝ կազմուած 726 կամ 741 բուականներին: Այն պարունակում է օրէնքների իրայասուկ ըմտրամի՝ բաղրած Յուստինիանոսի «Corpus juris civilis» ժողովածուից: Մամրաման տես՝ Մեծվեծ, И.П. Развитие право-вой науки Византии, ի Կոլլетура Византии, Մոսква 1969, 216:

պարակում, զինծառայութիւնից խուսափում, անբարոյ արարքներ եւ այլն): Սահմանուած են նաև պատիժներ՝ կատարուած յանցագործութիւններին համապատասխան:

Հաստ Օրէնսդրքի՝ հրամանապարական կազմը բաղկացած է հնգապետներից, տասնապետներից, հարիւրապետներից եւ իշխաններից (կոմսերից կամ տրիբուններից): Թագաւորը նշանակում էր դուկերին (դքսերին, կոմսերին), դուկերը՝ հազարապետերին, վերջիններս՝ հարիւրապետներին²⁷: Հազարապետը սովորական իշխան էր, իսկ կոմսը՝ մեծապատիւ («նախագլուխ») իշխան: Զինուորների պետերը կոչուել են «վերակացուներ»²⁸, բարձրաստիճան զինուորները՝ «իշխաններ», «զօրապետներ» եւ «կոմսներ»²⁹: Գործել են հրամանատարների ընտրովի զինուորական խորհուրդներ: Հաստ օրէնքի՝ աններելի օրինախախտումների համար եկեղեցու կողմից նզովուած զինուորականները չէին կարող ընտրուել խորհրդում: «Որք վասն շնուրեան եւ կամ վասն այլ անապաշխար գործոց դատապարտին նզովիւք ի սուրբ եկեղեցւոց՝ զինուորք, ոչ են ընտրեալ զինուորական խորհրդոյն»³⁰:

Զօրքը բաղկացած էր հեծեալ գնդից («ձիաւորներ») եւ հետեւակից: **ԼԲ. յօդուածի համաձայն՝** ծառայութիւնը զինուորների համար պայմանագրային է. զինուորն իր կամքով է զինուորագրուում: «...ընծայեաց կամաւէ զանձն իւր զինուորել», որ «...զդաշն զինուորելոյն ետ», այսինքն՝ ծառայութեան վերաբերեալ կամաւոր պայմանագիր է կնքել: Զինուորական կանոնադրութեամբ՝ պետերը պարտաւոր են հրամանգաւորել իրենց ստորադրեալներին, օրինակ՝ բացատրել, թէ նրանք ինչ գաղտնիքներ չպէտք է հրապարակեն, այլապէս՝ եթէ զինուորը անտեղեակութեան հետեւանքով գաղտնիք բացայացի, կը պատժուի նրա վերակացուն: «...իւր վերակացուն պատուհասի վասն այնը, զի ոչ զգուշացոյց զնա ի չասելն»³¹:

Օրէնսդրքով՝ զինծառայողների պարտականութիւններն են.

Ա.- Անձնուրաց ծառայել թագաւորին (պետութեանը), պահպանել երկրի սահմանների անձնունմինելիութիւնը, պետական գաղտնիքները:

27 Զինուորական Օրէնք ներսիսի Համբունացւոյ, Յշ. աշխ., յօդ. Բ.:

28 Անդ, յօդ. Դ.:

29 Անդ, յօդ. Գ., Դ., Զ., Ը., Ժ. Ժ. Ե. այլն:

30 Անդ, յօդ. Լ.Ա.:

31 Անդ, յօդ. Գ.:

Այս պարտականութիւնները չկատարողները համարում էին դաւաճաններ: Այսպէս, թագաւորի դէմ մեղանչողը ենթարկուում էր բարձրագոյն պատժի. «Որ ոք մեղիցէ առ թագաւորն, մեռանիցի նշաւակեալ եւ յիշաւակ նորա անարգանօֆ մնասցէ մինչեւ իսպառ»³²: Արքայական տան գիշերային պահապանն իր պահակատեղին լքելու համար դատապարտում էր մահապատժի, իսկ եթէ «...մարդասիրութեան արժանաւորի՝ հարկանեն զնա... հանեն ի պատւյն»³³: Խիստ պատիժներ են սահմանուած այն զինուորների համար, ովքեր՝

- ա.- դաւաճանաբար հակառակորդների մօտ էին գնում,
- բ.- լլտեսական գործունէութիւն էին ծաւալում՝ ի վնաս պետութեան,
- գ.- ոչ քրիստոնեայ թշնամու կողմն էին անցնում,
- դ.- առեւտուր էին թշնամինների հետ՝ վաճառելով զէնք կամ ուազմական նշանակութիւն ունեցող երկաթէ իրեր»³⁴,
- ե.- դաշնակցում էին թշնամինների հետ. «Եթէ ոք խորի շաղախել ընդ բարբարոսս, կամ դնէ ուխտ ընդ նոսա, ի գլխաւորէն պատուհասի»³⁵:

Բ.- Պահպանել հասարակական կարգն ու բնակչութեան անդորրը:

Խստօրէն պատժում էին խոռովութիւն յարուցող զինուորները. «Որ խոռվէ զխաղաղութիւն զինուոր, ի գլխաւորէն պատժի»³⁶: Դատապարտելի է նաեւ իշխանատենչութեան մղումով ժողովրդին անօրինական գործողութիւնների մէջ ներքաշելլ. «Որ անպատշանոյ սկիզբն լինի եւ զժողովուրդն ամբոխէ վասն իւր իշխանութիւն յափշտակելոյ, կամ զգլուխն հատանեն, եւ կամ ի գաւառէն տարագրեն»³⁷:

Գ.- Անթերի կատարել զինուորական կարգադրութիւնները, լինել կարգապահ, ժաշ եւ պարտաճանաչ:

32 Անդ, յօդ. ԻԱ.:

33 Անդ, յօդ. Ծ.:

34 Անդ, յօդ. ՄԱ., ՄԲ., ՄԳ., ՄԴ.:

35 Անդ, յօդ. ԻԲ.:

36 Անդ, յօդ. Խ.:

37 Անդ, յօդ. ԻԴ.:

Այս պահանջները խախտողները կրում էին վարչական տոյցեր, քրէական խիստ պատիժներ կամ պաշտօնազրկուում էին. «Եթէ ո՞վ գասհմանաւ պատուիրանին զանց առնե՛, ի զինուորութենէն անկցի»³⁸: Օրինակ, եթէ պայմանագիրը խախտելով՝ զինուորը կրկնակի փախչէր իր իշխանի մօտից, աստիճանազրկուում էր, քանզի «...իբրեւ զմատնիչ եղեւ ինքն իւրոյ ազատութեան»³⁹: Վերադասին՝ «նախագլուխ իշխանին» ընդդիմանալու համար զինուորները ենթարկուում էին մարմնական պատիժների, աքսորման կամ պաշտօնազրկման⁴⁰: Բերդը կամ քաղաքը պահպանողները, եթէ հանգստանալու պատրուակով դրանք յանձնէին ուրիշին՝ առանց իշխանի հրամանի, «գիխատութեամբ իրաւամբք դատապարտեցի»⁴¹:

Մառայութեան ժամկէտը չլրացած՝ զինուորական ծառայութիւնից խուսափողը եւս անարգ պատժի էր .ենթարկուում: Իսկ պատերազմ յայտարարելու ժամանակ դասակից փախչելու կամ վախից իր մարմնի վրայ վէրք առաջացնելու համար ծեծում կամ պաշտօնազրկուում էին⁴²: Եթէ զինուորները լքում էին ռազմի դաշտը կամ հրաժարաւում մասնակցել պատերազմին, ենթարկուում էին մահապատժի. «...կամ գագանա(ց) զկերակուր տան զնա, կամ զիայուէ կախեսցի»⁴³: Պատերազմի ժամանակ զինուորներին տուն թողնելու համար կոմսերը տուգանուում էին 30 դահեկանով: Պատժից ազատուում էին այն զինուորականները, ովքեր պատերազմի ժամանակ ռազմի դաշտից հեռանում էին՝ թշնամուց խոցուած լինելու պատճառով, քանզի «...ունի զվկայութիւն արութեան ի մարմինն»⁴⁴: Բայցեւ, ըստ ԺԳ. յօդուածի, բանտարկուում էին երկչուտ զինուորները, ովքեր փախչում էին՝ առանց թշնամուց խոցուելու կամ օրինական այլ պատճառով: Օրէնքը դատապարտուում է թուլամորթներին՝ ինքնասպանութեան փորձերի համար՝ սահմանելով. «...խայտառակեալ կործանեն ի պատույ զինուորութեանցն եւ ի գիտել գլխաւորին, եւս ծանրացուցանէ զպատուհան»⁴⁵: «Պատուազրկուած զօրականն այլեւս իրաւունք չունէր

38 Անդ, յօդ. Ի.:

39 Անդ, յօդ. ԼԲ.:

40 Անդ, յօդ. Ծ.:

41 Անդ, յօդ. Թ.:

42 Անդ, յօդ. ԻԳ., ԼԶ. եւ ԽԱ.:

43 Անդ, յօդ. ԻԷ.:

44 Անդ, յօդ. ԺԴ.:

45 Անդ, յօդ. ԼԶ.:

մտնել մարտի դաշտ. «Որ անպատճի որով եւ իցէ պատճառանօֆ եւ անկանի ի զինուորութենէն, ոչ այլ բնաւ պատճի լինի կարօղ առնուլ, կամ մտանել ի կարգ զինուորութեն»⁴⁶:

Զինակցին սրով վիրաւորելու համար սահմանհւած է ծանրագոյն պատիժ. «Եթէ հրամայաւդ զինուոր զիւր զինուորակիցն սրով հարկանէ, գլխատեսցի»⁴⁷: Իշխանին կամ զինակցին դիտաւորեալ մարմնական վնասուածք պատճառելու համար մեղաւորը հեռացւում է ծառայութիւնից՝ կրելով նաեւ մարմնական ծանր պատիժ⁴⁸: Հստ օրէնքի՝ դատից եւ պատիժը կրելուց խուսափողն աքսորւում է, եւ այդպիսի յանցաւորներին պատժելու իրաւունքով օժտուած է միայն թագաւորը. «պատուհաս ածեն ի վերայ նորա ըստ կամաց թագաւորին»⁴⁹:

Զինուորական կանոնակարգով խիստ պատժւում են նաեւ այն ծնողները, ովքեր պատերազմի ժամանակ խնայում են իրենց զաւակներին՝ նրանց չուղարկելով մարտադաշտ. «Եթէ ո՛վ զիւր որդին ի ժամանակ նակատուն խնայէ զինուորել ի պատերազմ, աքսորեցի եւ յընչից իւրոյց զրկեալ խայտառակեսցի»⁵⁰: **Փաստօրէն՝ այս դէպքում սահմանուած է եռակի պատիժ.** աքսոր, ունեցուածքի բռնագրաւում եւ հրապարակային պարսաւանք:

Դ.- Խաղաղ բնակչութեան նկատմամբ չկատարել քրեօրէն պատժելի արարքներ:

Հստ օրէնքի՝ եթէ զինուորը նիւթական վնաս հասցնի հարկատուին, կրկնակի կը հատուցի: Իսկ եթէ իշխանը կամ նրա հեծեալը ճանապարհին կամ ճորտ գիւղացու տանը նիւթական վնաս պատճառեն, կը դատուեն եւ կրկնակի կը հատուցեն վնասը⁵¹: Գողութիւն է համարւում գտնուած անասունը թաքցնելը եւ տիրոջը չվերադարձնելը: Այս դէպքում պատժւում է ոչ միայն մեղաւորը, այլեւ նրա գործակիցը. «...տուժի ինքն եւ իւր խորհրդակիցն որ թագուցին [յանցանքը]»⁵²: Կեղծ դրամներ ծախսելու,

46 Անդ, յօդ. ԻԶ.:

47 Անդ, յօդ. ԼԹ.:

48 Անդ, յօդ. ԽԸ. եւ ԾԶ.:

49 Անդ, յօդ. Լ.:

50 Անդ, յօդ. ԼԳ.:

51 Անդ, յօդ. Ը.:

52 Անդ, յօդ. Ժ.:

գինք գողանալու ու վաճառելու համար սահմանուած է պաշտօնազրկում եւ ազատազրկում⁵³:

Ե.- Լինել առաջինի, թոյլ չտալ զինուորական պատիւը վարկարեկող արարքներ:

Անբարոյ յարաբերութիւններ, որկրամոլութիւն, գինեմոլաւթիւն, ազահութիւն՝ արգելուած են զինուորականներին, որոնց համար եկեղեցին նզովում է օրինազանցներին:

Օրինակ՝ «Որք ի վերայ զինույ արբեցողութեան եւ այլ կերակրոց յիմարին եւ մեղանչեն ի զինուորացն, կացուցանէ զնոսա գլխաւորն առաջի եւ զպատուհասն թողու, բայց ի զինուորական կարգեն փոխարկէ զնա»: Այսպիսիք չէին կարող լինել զինուորական խորհրդի անդամ՝ ենթարկուելով անարգանքի⁵⁴: Զինուորն աստիճանազրկում ու պարսաւանքի էր ենթարկում նաեւ իր կնոջ դաւաճանութիւնը հանդուժելու համար. «Եթէ զինուորն առ շնուրեան կնոջ իւրոյ համաձայնի, ի բաց կացցէ ի զինուորութենեն եւ խայտառակեն զնա. եւ որ զայլոց ամուսին ապականէ, թէ հանութեամբ կնոշն զայս առնեէ, զիթեն հատամեն»⁵⁵:

Այդպէս՝ «Զինուորական օրէնքները» կարեւոր իրաւական փաստաթուղթ էր՝ իրականացնելու կիլիկեան Հայկական պետութեան ներքին եւ արտաքին մի շարք կարեւոր գործառոյթներ: Օրէնքների թարգմանչի՝ ներսէս Լամբրոնացու նպատակը ազգային ուժեղ բանակի ստեղծումն էր, զինուորների մէջ հայրենասիրութեան, արիութեան, պետական իշխանութեան նկատմամբ հաւատարմութեան ողի ներշնչելը: Այս փաստաթղթի կիրառումը նպաստել է հայոց պետութեան ինքնիշխանութեան ամրապնդմանը, ազգային անվտանգութեան ապահովմանը, ներքին կարգուկանոնի հաստատման ու բարոյական դաստիարակութեան ծաւալմանը: Այն գործադրուել է մինչեւ Սմբատ Սպարապետ (Գունդառարլ, 1208-1276)ի օրինաստեղծ գործունէութիւնը:

Կիլիկեան Հայկական պետութեան հռչակաւոր սպարապետ, հասարակական-քաղաքական գործիչ, դիւանագէտ, իրաւագէտ, օրէնտիր, թարգմանիչ եւ պատմիչ Սմբատ Սպարապետի քաղաքական ու ռազմական գործունէութիւնն ընթացել է Հեթումեան արքայատոհմի օրոք: Որպէս զօրավար՝ Սմբատը յայտնի դարձաւ

53 Անդ, յօդ. Խէ. եւ ԽԸ.:

54 Անդ, յօդ. ԽԲ.:

55 Անդ, յօդ. Խէ.:

Իկոնիայի (1246-1259) եւ Եգիպտոսի (1276) սուլթանների դէմ տարած յաղթանակներով, 1276ի վերջին մարտի ժամանակ նա հերոսաբար զոհուեց: Նրա գլխաւորած հայոց բանակի յաղթանակների շնորհիւ կիլիկեան Հայաստանում չուրջ 45 տարի համեմատաբար խաղաղ ժամանակաշրջան էր:

Սմբատ Սպարապետի «Դատաստանագիրք»⁵⁶ (1265) մատեանը կազմուել է կիլիկեան Հայկական թագաւորութիւնում հասարակական-քաղաքական եւ իրաւական յարաբերութիւնները կարգաւորելու նպատակով: Ինչպէս վերոյիշեալ օրէնսգէտների, այնպէս էլ Սմբատի օրէնսդրական գործութեան մեկնակէտը աստուածային իրաւունքն է: Դատաստանագրքի առաջաբանում նա գրում է. «Երանելի է անրիծների նանապարհը, ովքեր առաջնորդում են Տիրոջ օրէնքներով»⁵⁷: Աստուածային-քանական օրէնքներից են բխում աշխարհիկ-քաղաքական օրէնքները:

Սմբատի Դատաստանագիրքը ներառում է պետական-վարչական, քրէական, քաղաքացիական, ընտանեկան, ինչպէս նաև զինուորական կանոններ՝ պատերազմի եւ խաղաղութեան, միջազգային յարաբերութիւնների կարգաւորման, ռազմական հիմնահարցերի, զինուորական կարգուկանոնի վերաբերեալ: Զինուորական օրէնքները միահիւսուած են պետականութեան իրաւականուների հետ:

Ըստ Դատաստանագրքի՝ թագաւորի՝ որպէս ինքնակալ, ինքնիշխան միապետի բացառիկ իրաւունքներից են պետութեան ներկայացումը արտաքին՝ միջազգային յարաբերութիւններում, պատերազմ յայտարարելն ու հաշտութիւն կնքելը, պատժելն ու ներում շնորհելը: Թագաւորին էին պատկանում ռազմական արշաւանքների ընթացքում ձեռք բերուած ամբողջ ոսկին եւ ռազմավարի կէսը: Որոշակի հասոյթ սահմանուած է նաև եկեղեցու համար. «Պատշաճ է, որ թագաւորն իր շահած գումարի տասանորդը եկեղեցուն տայ»: Իսկ եթէ նա արշաւանքին չէր մասնակցում, ապա նրան պատկանում էր ռազմավարի 1/10ը եւ ամբողջ ոսկին⁵⁸:

56 Դատաստանագիրք Սմբատ Իշխանի (Գումդստաբլի), ՂԱՏՃԵԱՆ, Ա., (աշխատ.), Ա. Էջմիածին 1918:

57 ՍՄՐԱԾ ՍՊԱՐԱՊԵՏ, Դատաստանագիրք, Առաջարան, ԱԻԱԳԵԱՆ, Ռ., (աշխատ.), ի Հայ իրաւական մտքի գանձարան, Գիրք 1, Երևան 2001, 561:

58 ԱՅդ, յօդ. 1, 566, 568:

Օրէնսդրքում սահմանուած են նաեւ թագաւորի պարտաւորութիւնները պատերազմական իրավիճակում.

1) պատերազմը յաղթելուց յետոյ թագաւորին պատշաճ չէ այլեւս մարդասպանութիւնը՝ «...բացառութեամբ այն այլազգինների, որոնք կուտի պատճառն են եղել»:

2) Քաղաքը պաշարելիս թագաւորը պարտաւոր է Հնագանդութեան կոչել բնակչութեանը, խնայել Հնագանդների կեանքը եւ սպանել միայն մեղաւորներին: Մեղանչողները ներման են արժանանում ենթարկուելով միայն խոշտանգումների:

3) Թագաւորը պէտք է արգելի նուաճուած երկրների այգիները եւ արտերն աւիրել:

4) Նա աւարառութեան նպատակով չպէտք է գող ու աւազակ ուղարկի, այլ աւարը վերցնի բացայաց յարձակմամբ⁵⁹:

Ասպետութեան հիմնարկը կարեւոր նշանակութիւն ունէր Կիլիկեան Հայաստանում: Զիաւոր-ասպետները (ազատներ) կամ կալուածատէրերը կազմում էին գօրքի առանցքը: Հեծեալ-ասպետի կոչումը պարտադիր էր արքայազուն եւ ինքնակալ իշխանների համար: 14-15 տարեկան տղաներին այդ կոչմանն արժանացնում էր թագաւորը՝ ազգային-եկեղեցական մեծ տօնակատարութիւնների ժամանակ, երբ ասպետական աշխարհազօրի գօրատես էր անցկացնում: Ասպետները կրում էին «Մառայել խաչին եւ հայոց առիւծին» մակագրութեամբ հագուստ, որի վրայ պատկերուած էին ոսկէ խաչ եւ առիւծ: Ասպետներն ունին որոշակի արտօնութիւններ: Օրինակ՝ սահմանուած է այլահաւատների դէմ պատերազմում դէնքի ուժով ռազմաւար ձեռք բերելու իրաւունքը. «...աւելի օրինական ապրանք ու եկամուտ չկայ, քան այն, որ մարդ իր սրով ձեռք է բերում անհաւատների դէմ կուտում»: Օրէնքով թոյլատրելի է նաեւ ձեռք բերուած գոյքի վաճառքը կամ նուիրաբերումը, հակառակ դէպքում «...ան գող կը լինի, եւ պիղծ է այն ամէնը, ինչ պահում է, իսկ իդ օրինական բաժինը պահելը ազնիւ է»⁶⁰:

Մբաստ Սպարապետը սահմանել է պատիժներ՝ զինուորական օրինախախոռումների համար: Հստ նրա՝ պատիժը պէտք է կիրառել յանցագործութեան մէջ մեղադրուող անձի նկատմամբ՝ անհաւատական մեղսայնացման սկզբունքի համաձայն. «Եթէ որդին օրէնքով մահապատժի դատապարտուի, երա հօրը չպէտք է բանտարկել,

59 Անդ, յօդ. 1, 566:

60 Անդ, յօդ. 143, 623:

եւ ոչ էլ եղրօրը», որովհետեւ «...արդարադատութիւնը պահանջում է, որ ամեն մարդ իր գլխով պատասխան տայ»⁶¹: Դատաստանագրքում միակ բացառութիւնը պետական դաւանանութիւնն է, երբ մահուան դատապարտուած անձի հետ պատասխանատութիւն են կրում կինը, եղբայրները եւ յանցագործութիւնից յետոյ ծնուած նրա զաւակները: Օրինակ՝ թշնամուն ռազմավարական նշանակութեան բերդեր կամ այլ կառոյցներ յանձնելու դէպքում մեղսագործները մահապատժի են ենթարկում, իսկ «...նրանց կանայք ու երեխաները ծառայի կարգով պահում են թագաւորի պալատում» կամ վաճառուում են⁶²:

Թագաւորն ունի Յերման իրաւունք, եւ նրա ամենամեծ ողորմածութիւնը՝ «...կեանքը խնայելու դէպքում, յանցաւորին կուրացնելն է»: Բայց եթէ յանցագործի դաւանանութիւնն ապացուցում է, ներումը բացառում է: Մմբատը դաժան պատիժ է սահմանել այն անձի համար, ով «...քուրքի է յանձնում քրիստոնեային»: Այս պարագայում մեղսագործը դատապարտում է մահապատժի կամ ենթարկում մարմնական տանջանքների: Ըստ օրէնքի՝ պէտք է «...հանեն աշքերը կամ կտրեն զոյգ ձեռքերը եւ պէտք է ցմահ ապաշխարի»⁶³:

Այդպէս՝ ելնելով պետական անվտանգութեան գերիննդրից՝ Մմբատ Մպարապետն առաւել կարեւորում է պետական սահմանների, ռազմավարական նշանակութեան կառոյցների պահպանումը, դատապարտում պետութեան դէմ կատարուած յանցագործութիւնները (դաւանանութիւն, լրտեսութիւն, զինուորական գաղտնիքի հրապարակում եւ այլն): Միաժամանակ, ելնելով մարդասիրական նկատառումներից, օրէնսգէտն արգելում է վայրագ գործողութիւնները եւ խաղաղ բնակչութեան կոտորածը թշնամու գրաւուած տարածքներում:

Հայ իրաւաքաղաքական մտքի պատմութեան մէջ առանձնակի տեղ ունի ԺԼ. դարի ազգային-ազատագրական պայքարի եւ սահմանադրական պետականութեան գաղափարախօս ՇԱՀԱՄԻՐ ՇԱՀԱՄԻՐԵԱՆը (1723-1797): Նրա գլուխգործոցը՝ «Որոգայք փառաց»ը⁶⁴ (1773), արտացոլում է ազգային քաղաքական մշակոյ-

61 Անդ, յօդ. 124, 617:

62 Անդ, յօդ. 1, 565:

63 Անդ:

64 ՇԱՀԱՄԻՐ ՇԱՀԱՄԻՐԵԱՆ, Գիրք ամուամեալ Որոգայք փառաց վասն կալանաւորելոյ ամենային գործ ամկարգութեամ, Տպգր. Ն. Աղաթեամի, Թիֆլիս 1913:

Թի էական ընութագծերը: Նա առաջադրել է իրաւական-ժողովրդավարական պետութեան ձեւ՝ հիմնուած ազգային ինքնիշխանութեան, օրէնքի գերակայութեան, խորհրդարանական կառավարման եւ հասարակական բարօրութեան սկզբունքների վրայ: Ինչպէս միջնադարի հայ օրէնսգէտների, այնպէս էլ Շահամիրեանի քաղաքական փիլիսոփայութեան եւ օրէնսդրական գործունէութեան հիմքում մարդու հիմնախնդիրն է: Կառավարման լաւագոյն համակարգը, ինչպէսեւ դրական իրաւունքի (այդ թւում՝ զինուորական օրէնքների) ակրոնքները նա փաստարկում է՝ բացայատելով մարդու արարման խորհուրդը, բնութիւնը, անձնիշխանութիւնը, նպատակն ու կոչումը⁶⁵:

Շահամիրեանի մեկնութեամբ՝ Աստուած ողջ գոյերի Սկզբնապատճառն ու Նախաշարժիչն է: Նա մարդուն-արարեց բնական բնութեամբ, իսկ Աստուածային չնչով չնորհեց բանական ոգի, որ կարողանայ իմաստնութեամբ կառավարել: Աստուած ստեղծեց եւ պատուիրեց պահպանել Օրէնքը, որպէսզի որեւէ մէկը չկարողանայ իշխել մարդու բնութեան եւ հոգու վրայ, բացի Աստծուց: Մարդը պէտք է ապրի ոչ թէ իբրեւ գաղանաբարոյ եւ փոփոխական բնութեամբ արարած, այլ որպէս բանական զօրութեամբ ու կատարեալ էութեամբ մարդ՝ սանձելով փոփոխական բնութիւնն անխախտ օրէնքներով: Քանզի օրէնքը որոգայթ է նրանց համար, ովքեր փորձում են չարաշահել իրենց դիրքը, կատարել ինքնիշխան, ինքնագլուխ գործողութիւններ:

«Որոգայթ փառացի» առաջին՝ ներածական մասն ազատութեան ու անկախութեան գաղափարների ու դրանք իրականացնողների ջատագովութիւն է, որ տեսական-իմաստասիրական եւ գիտամեթոդաբանական նշանակութիւն ունեցաւ Հայաստանի Սահմանադրութեան նախագծի կերտման գործում: Նախագծում առկայ միջազգային եւ զինուորական իրաւականները բխում են Հայաստանի սահմանների անվտանգութեան պահպանման, երկրի ներքին կարգուկանոնի հաստատման նպատակներից:

Շահամիրեանը գնահատում է վրացիներին, ովքեր պահպանեցին «շուր ազատութեան ի մէջ ազգին իւրեանց»՝ չթուլացնելով բա-

65 Մանրամասն տես՝ ՍԱՐՎԱԶԵԱՆ, 1., Շահամիր Շահամիրեամի բաղաժական-փիլիսոփայական հայեցակարգը՝ որպէս օրէնքորութեան հիմք, ի Պատմութիւն եւ հասարակագիտութիւն (Գիտական յօդուածների ժողովածոյ), ՀՊՄՀ հրտ., Երևան 2016, 335-356:

նական հոգու զօրութիւնը: Մտածողն առաւել արժեւորում է Ամերիկան Անկախութեան պատերազմը՝ յանձինս Ջորջ Վաշինգտոնի, ով պայքարում էր յանուն ազատութեան՝ ընդդիմանալով բրիտանացիներին: Ամերիկացու ազատափակութիւնը «...քնական է ի բնութեանս մարդոյ»: Ճիշտ այդպէս էլ հայերը պէտք է ջանան ազատուել բռնատիրութիւնից ու ազգային օրէնքներով վերականգնել պետականութիւնը: Նա ազատութեան ջատագովութիւնն աւարտում է իմաստուն խորհրդով: «Լինիցուք մեմ տէր միմիշայն յաշխարեին մերոյ եւ քոյլ մի՛ տացուք, զի քայլ մի ի յերկրէ այլոց աւելանալոյ վասն մեր, եւ մէնց պակասի վասն այլոց, ուրեմն շանալ ստանալ այն, որ սեպհական ժառանգութեան Հայոց ոչ է անիրաւութիւն եթէ ո՛չ արդարութիւն (ընդծումը.- Լ.Ս.):»⁶⁶:

Կարեւորելով ոազմարուեստի նշանակութիւնը՝ Շահամիրեանը հէնց ներածութեան մէջ հայ հայրերին յորդորում է որդիներին սովորեցնել «...զէնքի հետ վարուելու [կերպը], զինուորական արհեստը եւ հնազադուել օրէնքներին»: Իսկ հայ տիկնանց խորհուրդ է տալիս այնպէս դաստիարակել դուստրերին, որ «...նրանք ամուսնանան քաջ տղամարդկանց եւ յաղբական զինուորականների հետ», ինչպէս նաեւ դատապարտեն ամուսիններին, «...եթէ նրանք ծառայութեան մտնեն այլ ազգերի մօտ»⁶⁷: Մտածողի համոզմամբ՝ այս պատճամների կատարումը բաւարար կը լինի, որ Հայաստանում հաստատուի պղգային բարօրութիւն ու երջանիկ կեանք:

Մահմանադրութեան առաջին յօդուածում որոշարկուած են Հայաստանի պետական սահմանները. Հանրապետութիւնը պէտք է ստեղծուէր Հին Հայաստանի սահմանների շրջանակում՝ ընդգըրկելով Արեւմտահայաստանը, Արեւելահայաստանը եւ Աղուանքը: Հայկական ողջ տարածքը՝ «...կենդանական ու բուսական պաշարներով եւ արդիւնքներով եղել է եւ պիտի մնայ Հայաստան անուամբ, եւ նրա բնակիչները՝ որպէս մարդկային հանրութիւն կոչւում են հայեր, եւ ողջ կենդանական աշխարհը՝ Հայաստանի երկրի երեսին, թէ ջրերում, հայ ժողովրդի ժառանգութիւնն է. այս աշխարհից չպէտք է աւելանայ

66 ՇԱՀԱՄԻՐ ՇԱՀԱՄԻՐԵԱՆ, Գիրք անուանեալ Որոգայթ փառաց վասն կալանաւորելոյ ամենայն գործ անկարգութեան, 139: Նկատի ունենալով, որ Շահամիրեանն իր աշխատութիւնը շարադրել է դժուարըմբների միջին գրաբարով, բնագրային մէջբերումներն այսուետ կը ներկայացունեն աշխարհարար բարգմանութեամբ:

67 ՇԱՀԱՄԻՐ ՇԱՀԱՄԻՐԵԱՆ, Որոգայթ փառաց, ի ԱԻԱԳԵԱՆ Ռ., (աշխ.), Հայ իրաւական մտքի գանձարան, Բ., Երևան 2002, Յաւելուած 1, 45:

կամ պակասի ոչ մի թիգ հող, այստեղ միշտ հաստատ պէտք է պահպանուի Հայոց Տունը⁶⁸ համաձայն Հայաստանի սահմանադրութեան»⁶⁹:

Ալդպէս՝ Հայաստանի պատմական ողջ տարածքը, բնիկ ազգաբնակչութիւնը, երկրի ընդերքը, ջրերը եւ այն ամէնը, ինչ գտնուում է երկրում, հոչակուում է հայոց ազգային-պետական անօտարեի սեփականութիւն՝ ազգային կառավարութեան իշխանութեան ներքոյ: Վերականգնուում է Հայաստանի վարչատարածքային նախկին բաժանուումը՝ ըստ նահանգների եւ գաւառների, «...որպէսզի ոչ ոք չհամարձակուի անգամ մի քիչ հող աւելացնել կամ պալկասեցնել որեւէ տեղից»⁷⁰: Մահմանադրօրէն ամրագրուում է հայ ազգի իրաւական անձ լինելը:

Ըստ նախագծի՝ Հայաստանի օրէնսդիր մարմինը՝ Հայոց Տունը, ընտրուում է թէ՛ գործադիր իշխանութիւնը, թէ՛ երկրի տարբեր գերատեսչութիւններն ու դրանց ղեկավարներին: Իւրաքանչիւր բարձր պաշտօնեայ՝ պատգամաւոր, նախարար, դատաւոր, զօրապետ եւ այլն, իր խորհրդականներով չի կարող պաշտօն ստանալ, «...եթէ բուն հայոց սեփական ազգից եւ ծնունդով Հայատանցի չի եւ Քրիստոսով մկրտուած չի Հայաստանեաց Սուրբ Եկեղեցու դաւանութեամբ»⁷¹:

Հայաստանում պէտք է գործէին հետեւեալ զինուորական գերատեսչութիւնները.

~ Սպարապետութիւն. երեք տարով ընտրուում էր ինը անձ՝ զօրապետութեան պաշտօնի համար: Նրանցից իւրաքանչիւր երեքը կազմուում էին առաջին, երկրորդ եւ երրորդ սպարապետութիւնները: Ըստ հանդերձանքի գոյնի՝ երեք սպարապետութեան զօրապետերը կոչուում են «կարմիր սպարապետ, կալպոյտ սպարապետ եւ դեղին սպարապետ»: Նրանց դրոշները նոյն գոյներով են, եւ զօրքերը կրում են կարմիր, կապոյտ եւ դեղին՝ համազգեստ⁷²:

68 «Հայոց տուն» հասկացութիւնը Շահամիրեանը կիրառում է տարբեր իմաստներով՝ որպէս «Հայկական պետութիւն», «Հայոց աշխարհ», «Հայաստան», «Հայոց օրենսդիր մարմին» եւ այլն:

69 ՇԱՀԱՄԻՐ ՇԱՀԱՄԻՐԵԱՆ, Որոգայր փառաց, Աշխարհ, յօդ. 1, 46-47:

70 Անդ, յօդ. 107, 100:

71 Անդ, յօդ. 33, 59:

72 Անդ, յօդ. 24, 56, յօդ. 285-287, 134:

- ~ Ասպետութիւն. ինը անձ ընտրւում է հեծելազօրի հրամանատարութեան համար («վասն ասպետութեան»)⁷³:
- ~ Հրաճգային բարձր հրամանատարութիւն. ինը անձ ընտրւում է «հրաճգային զօրքերի բարձր հրամկազմի («հրաց զօրագլխութեան») համար»⁷⁴:
- ~ Բանակի այլ պաշտօնապետեր. 27 մարդ (երեքական անձով) երեք տարով ընտրւում է հետեւեալ պաշտօններում.
 - ա) «լրտես պետութեան» հետախուզութեան պետ. երեք անձինք պէտք է ապահովեն երկրի անվտանգութիւնը, տեղեկութիւններ հայթայթեն՝ Հայոց պետութեան նկատմամբ արտաքին վտանգի, այլ պետութիւնների յանցաւոր մտադրութիւնների վերաբերեալ եւ դրանք հաղորդեն Գաղտնի խորհրդին՝
 - բ) զինամթերքի մատակարարման պետ,
 - գ) վառօդի արտադրութեան պետ,
 - դ) կառաշինութեան պետ,
 - ե) վրանաշինութեան պետ,
 - զ) սննդամատակարարման պետ,
 - է) «գանձապետութիւն» դրամական գործառնութիւնների պետ,
 - ը) «երկրաչափութեան» պետ հողաշինութեան եւ տեղազարննութեան գործերի,
 - թ) «պետ տկարաց եւ աղքատաց»⁷⁵ հիւանդանոցների եւ աղքատանոցների պետ:
- ~ Հազարապետութիւն. Հայոց Տան բոլոր պատգամաւորների միջից ընտրւում է 90 անձ՝ «...հազարապետութեան պաշտօնի համար... իրենց կեանքի լրիւ ժամանակով»⁷⁶, այսինքն՝ ցմահ։ Հայոց բանակի 1000 զինուորից բաղկացած իւրաքանչիւր զօրամաս գլխաւորում է մէկ հազարապետ։ Վերջինս ունի իւրաւունք՝ անօրինականութեան դէպքում պատժել ենթակա-

73 Անդ, յօդ. 25, 57:

74 Անդ, յօդ. 26, 57:

75 Անդ, յօդ. 27, 57, յօդ. 65, 75:

76 Անդ, յօդ. 27, 57:

77 Անդ, յօդ. 30, 58:

ներին վարչական տոյժով կամ կալանմամբ, բայց եթէ դատարանն ապացուցի կալանուածի անմեղութիւնը, հազարապետը պարտաւոր է «...պատասխանատութիւն կրել կալանաւորութեան հետեւանքով զինուորին հասցուած վնասի համար»⁷⁸:

Մահմանադրութեան նախագծում առկայ են զինուորական բազմաթիւ կանոններ՝ Հայաստանի զինուած ուժերի, երկրի անվտանգութեան պաշտպանութեան, զինուորականների իրաւունքների ու պարտականութիւնների, զէնքի պատրաստման, դրա ներմուծման ու արտահանման, գերեվարութեան եւ այլ հարցերի վերաբերեալ:

Հայաստանի պետութիւնը պէտք է պահպանի «իննուուն հազարանց վեարովի բանակ՝ եօրնամեայ զինուորական ծառայութեան ժամկետով»⁷⁹: Զօրքը կոչուած է հաւատարմօրէն ծառայել Հայ ժողովրդին: Բանակը կազմուած է 21000 հեծեալ եւ 69000 հետեւակ զօրքից: Զօրքը բաղկացած է երեք զօրամիաւորումից, որոնցից իւրաքանչիւրն ունի 7000 հեծեալ եւ 23000 հետեւակ: Շահամիրեանը սահմանել է զօրքի համալրման յատուկ կարգ, որի համաձայն՝ զօրքը համալրում է կամաւոր հիմունքներով կամ վիճակահանութեամբ: «Եթէ զինուորական ծառայութեան մէջ կամաւոր կերպով մտնեն իննուուն հազար հայոց երիտասարդներ ու պատանեներ՝ բաւարար է», իսկ եթէ ոչ, ապա «...Հայոց պետութիւնը բոլոր գաւառներից ու բնակավայրերից պատանեներ է հաւաքագրում վիճակահանութեամբ՝ հարիւրից հինգին»⁸⁰: Եօթ տարի ծառայելուց յետոյ զինուորն ազատ է՝ վերադառնալու տուն:

Բանակը գլխաւորում է Հայոց Տանն ընտրուած ինը զօրապետ: Ինչպէս նշուել է, նրանցից իւրաքանչիւր երեքը կազմում է առաջին, երկրորդ եւ երրորդ սպարապետութիւնները: Հեծելազօրն ու հետեւակազօրն իրենց զօրապետներով «...ենթարկում են նախարարի՝ գրաւոր եւ բանաւոր հրամաններին՝ հնազանդ Հայոց Աւագների խորհրդին»⁸¹: Հայաստանի վարչատարածքներում տեղակայուած զինուած ուժերը ենթարկում են զօրահրամանատարին, ով «...դեկավարում է նահանգի կառավարչի հրահանգներով»⁸²: Այդ-

78 Անդ, յօդ. 74, 82:

79 Անդ, յօդ. 277, 131-132:

80 Անդ, յօդ. 411, 168. յօդ. 353, 150:

81 Անդ, յօդ. 278, 132:

82 Անդ, յօդ. 164, 111:

պէս՝ զինուած ուժերը վերահսկում է պետական (կենտրոնական եւ նահանգային) իշխանութիւնը։ Բայց «...պատերազմի ժամանակ զինուորական իւրաքանչիւր խմբաւորում իր հրամանատարին ընդունում է որպէս նախարար»⁸³, այսինքն՝ գործադիր իշխանութեան բարձրագոյն պաշտօնեայ։ Հրամանատարներն ունեն տեղակալներ, եւ եթէ վիրաւորում է առաջին տեղակալը, զինուորները երկրորդ տեղակալին ընդունում են նոյն կարգով։

Շահամիրեանը նախագծում սահմանել է զօրահրամանատարների ու զինուորների իրաւունքներն ու պարտականութիւնները։ Նա կարեւորում է հրամանատարների ռազմադաստիարակչական պարտաւորութիւնը։ Իւրաքանչիւր Շաբաթ օրուայ երեկոյեան նրանք պէտք է զինուորների համար մեկնաբանեն զինուորական օրէնքները⁸⁴։ Հազարապետերը պարտաւոր են աշալուրջ լինել իրենց պաշտպանութեան յանձնուած տարածքներում, հաշուառել զօրամասի զինուորներին, տեղեկատուական զեկոյց ներկայացնել զօրապետին, ստուգել զինուորների հանդերձանքն ու լրացնել պակասը⁸⁵։ Հրամանատարներն իրենց ենթակայութեան ներքոյ գտնուող զօրքի վերաբերեալ պարտաւոր են տարեկան չորս հաշուետուութիւն ներկայացնել իրենց պետին՝ հետեւեալ կարգով։ տասնապետը հաշուետու է հարիւրապետին, հարիւրապետը՝ հազարապետին, հազարապետը՝ զօրագլխին, զօրագլուխը՝ սպարապետին, իսկ սպարապետը՝ նախարարին։ Ի վերջոյ՝ «Նախարարը հաշուետուութիւն է ներկայացնում Հայոց Տան Աւագների խորհրդի պալատի ատեան»⁸⁶, որտեղ ամփոփում են տարուայ ռազմական արդիւնքները։

Հստ օրէնքի՝ զինուորական դասին պատկանող անձինք պարտաւոր են պաշտպանել սեփական արժանապատուութիւնը։ Եթէ որեւէ մէկը՝ տասնապետից մինչեւ նախարար, անարգանքի է ենթարկւում ինչ-որ անձից ու անպատասխան է թողնում, իսկոյն պաշտօնանկ է արւում, «...քանզի մի անգուսպ մարդուց չի կարողացել պաշտպանել իր աստիճանի ազատ դասի պատիւր»⁸⁷։

Զինուորներն իրաւունք ունեն յարձակուել միայն հրամանատարի հրամանով, սակայն «...բացառում է Աւագների խորհրդի՝

83 Անդ, յօդ. 280, 133։

84 Անդ, յօդ. 301, 136։

85 Անդ, յօդ. 302, 136։

86 Անդ, յօդ. 307, 137։

87 Անդ, յօդ. 494, էջ 181։

Հայոց գերագոյն իշխանութեան վրայ յարձակուելը եւ Աւագների խորհրդի հրամաններին չենթարկուելը»⁸⁸: Իւրաքանչիւր զինուոր պարտաւոր է Հետեւել մաքրակեցութեան կանոններին, մաքուր պահել իր հագուստը, իւղով մաքրել զէնքը, ուսապարկում ունենալ որոշակի զինամթերք⁸⁹:

Օրէնսդրօրէն կարգաւորուում է նաեւ գէնքի արտադրութիւնը: Ըստ Շահամիրեանի՝ Հայաստանում նպատակայարմար է, որ հրացանները պատրաստուեն հաւասար չափերի՝ փողի երկարութեամբ ու տրամաչափի մեծութեամբ, որ հարկ եղած դէպքում «...մի հրացանի կայծքարը, գնդակը եւ միջոցը փոխարինուի միւսով»⁹⁰:

Զինուորական օրէնքները ներառում են որոշակի պատիժներ՝ ուղղուած օրինազանցների դէմ: Ըստ օրէնքի՝ զինուորական իւրաքանչիւր պաշտօնեայ Աւագների խորհրդի հրամանները զանցառութիս «...կորցնում է իշխանական ազատութիւնը, կալանաւորուում զանցառուի տեղակալի կողմից եւ շղթայակապ բանտարկուում»⁹¹: Ընդ որում՝ անհնազանդութեան համար սահմանուած են խիստ պատիժներ՝ ընդհուպ մահապատիժ: Հայոց նախարարն իրաւունք ունի մեղադրանք ներկայացնել զինուորական օրինազանց պաշտօնեաների դէմ եւ կալանել տալ նրանց: Բայցեւ նախարարի իրաւունքը սահմանափակ է, քանզի զինուորականներին պաշտօնազրկելու համար նա «...պարտաւոր է ունենալ արարքի յանցաւորութեան աստիճանից ելնող դատական վճիռ»⁹²: Կալանաւորուած կամ կարգապահական տոյժի ենթարկուած զինուորականները պէտք է հնազանդուեն իրենց վերադասին: Նրանք կարող են ազատ արձակուել միայն դատարանի վճռով:

Սահմանադրութեան մի շարք յօդուածներ վերաբերում են պատերազմական իրադրութեանն առնչուող խնդիրներին, օրինակ՝ մարտադաշտում զօրքի կայանմանը (յօդ. 328, 336), զօրաշարժի կարգին (յօդ. 329, 332, 333), տեղազննութեանը (յօդ. 331, 335), զօրամաս բերուող եւ տարուող գրութիւնների վերահսկմանը (յօդ. 338), արտակարգ դրութեան յայտարարմանը (յօդ. 344), մարտական գործողութիւններին (յօդ. 334) եւ այլն:

88 Անդ, յօդ. 281, էջ 133:

89 Անդ, յօդ. 304-306, 137:

90 Անդ, յօդ. 117, 102:

91 Անդ, յօդ. 486, 179:

92 Անդ, յօդ. 309, 138: Անդ, յօդ. 308:

Շահամիրեանը սահմանել է նաեւ արգելող կանոններ։ Օրինակ՝ «Ոչ ոք՝ ինչ կոչում էլ ունենայ, իրաւունք չունի բանակից դուրս հանել ոչ զենք, ոչ սենդամբերք, ոչ դրամական միջոցներ... առանց սպարապետի գրաւոր թույլտութեան»⁹³, հակառակ պարագայում՝ կը կալանաւորուի։

Ուշագրաւ են «Որոգայթ փառացում» սահմանուած միջազգային իրաւականութեարը, որոնք վերաբերում են պատերազմական իրավիճակում գործող հաղորդակցութեան, գերեվարութեան, աւարի բաժանման, պաշարուած բնակավայրերից դուրս գալու կարգին, գրաւեալ տարածքների բնակչութեան անձնական եւ գոյքային իրաւունքների պաշտպանութեանը, ուազմատուգանքին ու խաղաղութեան դաշնագրերին։

Հստ օրէնքի՝ «Պատերազմի ժամանակ բանագնացութիւնն ազատ է միայն օրապետերի միջեւ»։ Բանագնացներն ազատ ելումուտ ունեն հակառակորդի բանակատեղի՝ «...սպիտակ դրօշը ձեռքին, որ բանագնացի նշանն է»⁹⁴։ Նրանք յանձնում են պաշտօնական գրութիւնները եւ ապահով վերադառնում իրենց բանակատեղի։ Բանագնացներն իրականացնում են նաեւ հասարակական թղթակցութիւն։ Հակառակորդի կամ գրաւեալ երկրներում գտնուող հարազատներին հասցնելով զինուորականի կամ այլ անձանց նամակները՝ նրանք պատասխան գրութիւնները բերում են հասցէտէրերին, եթէ դրանք զերծ են ուազմական կարեւոր կամ գաղտնի տեղեկատուութիւնից⁹⁵։ Սակայն «Պատերազմի ժամանակ բռնուած թշնամի ամեն մի լրտես իսկոյն մահապատժի է ենթարկում»⁹⁶,

Այդպէս, կարեւորելով զինուորականների ու ժողովրդի քաղաքացիական իրաւունքների իրացումը՝ Շահամիրեանը, ինչպէս Միխիթար Գօշն ու Մբատ Մպարապետը, գերագոյն պատիժ է սահմանում պետութեան եւ ազգի անվտանգութեանը սպառնացող զինուորական յանցագործութիւնների համար։

Օրէնսգէտը մարդասիրական վերաբերմունք է պահանջում պաշարուած բնակավայրերի զինուորների ու խաղաղ բնակչութեան հանդէպ։ Հստ օրէնքի՝ եթէ որեւէ նահանգի, քաղաքի կամ

93 Անդ, յօդ. 337, 145:

94 Անդ, յօդ. 321, 141:

95 Անդ, յօդ. 322, 141:

96 Անդ, յօդ. 467, 176:

ամրոցների յանձնման վերաբերեալ կնքուած է դաշնագիր՝ պէտք է անխախտ պահել այն (յօդ. 320): Պաշարուած քաղաքի զինուորներին ու բնակիչներին տրուում է 15օրեայ արտօնեալ ժամկէտ՝ «...ընտանիքով եւ ունեցուածքով դուրս գալու թշնամու քաղաքից կամ ամրոցից»⁹⁷: Նրանք իրաւունք ունեն մնալ Հայոց երկրում՝ որպէս ազատ վտարանդի, եթէ վճարեն իրենց ունեցուածքի տասանորդը: Իսկ պատերազմի աւարտից եւ խաղաղութիւն հաստատուելուց յետոյ կրկին ազատ են՝ վերադառնալու իրենց հայրենիք:

Միաժամանակ՝ դաժանօրէն պատժում է դաշնագիրը խախտող թշնամին: Եթէ որեւէ կառավարիչ կամ բերդակալ դաւաճանութեամբ խախտում է Հայոց զօրքի պաշարած քաղաքը կամ բերդը խաղաղ յանձնելու դաշնագիրը, ինչի հետեւանքով զոհուում է 24 հայ զինուոր, Հայոց բանակը պարտաւոր է յարձակուել եւ մտնել քաղաք կամ բերդ: Այս պարագայում՝ «...թշնամու ոչ մի զինուոր կամ հրամանատար կենդանի չպէտք է մնայ մեր սրի բերանից», իսկ օրինազանց կառավարիչը կամ բերդակալը «...անարգանքի ենթարկուելով՝ պէտք է կախուի քաղաքի դարպասից կամ բերդի գլխից», եւ թշնամու ողջ ունեցուածքը դառնայ Հայ զինուորների օրինական աւարդ: Հստ օրէնքի՝ մինչեւ մեղաւորը չմեղանչի, «...թշնամու բնակչութեան նկատմամբ մեր զինուորների կատարած ամեն մի գործողութիւն դատապարտելի չէ»⁹⁸:

«Որոգայթ փառացում» առկայ է օրէնք՝ օտարազգի քրէական յանցագործի պաշտպանութեան վերաբերեալ: Պատերազմի կամ խաղաղութեան ժամանակ օտար երկրից փախած քրէական յանցագործը կարող է ապաստանել Հայաստանում՝ պէտութեան երաշխաւորութեամբ ազատուելով մահապարտութիւնից: «Ոչ ոք իրաւասու չէ հեռացնել նրան Հայոց պետութեան սահմաններից՝ քացանութեամբ,» եթէ տուժող կողմը կեանքի ներում է շնորհում նրան, եւ նա կամովի ցանկանում է լին մեր երկիրը, ապա նա ազատօրէն կարող է հեռանալ՝ ուր իմբը կամենայ»⁹⁹:

Պատերազմի ժամանակ Հայաստանում ապրող օտարազգիների անձը եւ ունեցուածքը յայտարարւում են անձեռնմխելի: Իսկ եթէ որեւէ մէկը ցանկանում է վերադառնալ հայրենիք, ապա պատերազմի հռչակման օրից սկսած՝ 45 օրուայ ընթացքում

97 Անդ, յօդ. 325, 141-142:

98 Անդ, յօդ. 491, 180:

99 Անդ, յօդ. 326, 142:

կարող է ստանալ իր անձի մասին ազատագիր եւ հայերի պաշտպանութեամբ հասնել մինչեւ իր երկրի սահմանը: Այս դէպքում «...նրա ողջ ունեցուածքը մեռում է իր ներկայացուցչի խնամքի տակ՝ մինչեւ խաղաղութեան հաստատումը, որից յետոյ կարող է իր ունեցուածքը հանել մեր երկրից»¹⁰⁰:

Գրաւեալ տարածքներում արգելուում է աւերել ժողովրդի տներն ու այգիները, բացի այն շինութիւններից, որոնց քանդելն անհրաժեշտ է ուազմավարական նպատակներով (յօդ. 389): Իսկ դաշնագրով յանձնուած թշնամու գաւառների բնակիչները «...անձի եւ գոյքի պաշտպանութիւն են գտնում մեր կողմից, որի համար պետք է նրանց պահպանել որպես մեր ժողովուրդ եւ քոյլ տալ... ազատօրէն տնօրինել սեփական ունեցուածքը» (ընդգծումը - Լ.Ս.): Միայն այն հարկերն ու մաքսը, որ նրանք տալիս էին իրենց տէրերին, պէտք է տան հայերին: Հնդ որում՝ բանակի նահանջելու ժամանակ «...ոչ ոք իրաւունք չունի գերել նրանց, տեղահանել իրենց բնակավայրերից եւ աւարի ենթարկել նրանց ունեցուածքը. նրանք իրենց տեղերում են մեռում հաստատ ու անշարժ՝ հնագանդուելով իրենց տէրերին»¹⁰¹:

Հստ օրէնքի՝ հայերի պաշտպանութեանն ապաւինած օտարների գաւառները, աւանները, այգիներն ու ընտանի կենդանիները յայտարարւում են հայերի ժառանգական սեփականութիւնը, իսկ «...նրանց տէրերը հաւասարեցում են սովորական հարկ, մաքս, հաս, բաժին վեարող մեր հնագանդ բնակչութեանը»¹⁰², եւ ապահովւում է նրանց անվտանգութիւնը: Սակայն, եթէ պաշտպանութիւն ստացած հապատակները դաւաճանում են, «...արժանանում են իրենց դաւաճանութեամբ պատճառած վնասին համապատասխան պատժի, ընդհուպ՝ մահապատիժ, գերութիւն եւ ողջ ունեցուածքի բըռնագրաւում»¹⁰³: Դատավճիռը կայացնում է այն սպարապետը, ում գնդի զինուորները տեղեկացրել են դաւաճանութեան մասին:

Սահմանադրութեան նախագծում սահմանուած է նաեւ գերեսվարութեան կարգը: Մի շարք իրաւականոններում արգելուում է գերիների սպանութիւնը, վաճառքը եւ կանանց գերավարութիւնը: Այն զինուորականը կամ զօրահրամանատարը, ով «...սառնարին կերպով սպանում է իր անմեղ գերուն՝ մահապատժի է ենթարկ-

100 Անդ, յօդ. 325, 142:

101 Անդ, յօդ. 387, 162:

102 Անդ, յօդ. 390, 163:

103 Անդ, յօդ. 391, 163:

ւում»¹⁰⁴: Բայց եթէ գերին անհնազանդ է, նա է խստօրէն պատժուում: Օրինակ՝ եթէ հայոց զօրքին գերի յանձնուած թշնամու զինուորը կամ հրամանատարը մինչեւ խաղաղութեան դաշինք կնքելը զինուած յարձակուի հայերի վրայ կամ փախչի, մահապատժի է ենթարկուում (յօդ. 488): Իսկ եթէ զինուորականն անձնատուր է լինում հայ զինուորի կամ սպայի հանդիպելիս եւ զէնքը վայր է դնում, «...չպէսք է սպանուի» (յօդ. 318):

Պատերազմի ժամանակ թէ՛ հեթանոս, թէ՛ քրիստոնեայ գերիները վաճառքի ենթակայ չեն: Նրանց պէտք է պահել մինչեւ խաղաղութեան հաստատումը: Գերիների պահպանման ծախսերը պարտաւոր է վճարել թշնամի պետութիւնը, իսկ եթէ զլանում է վճարել, «... գերուածներին դատապարտում է ծառայական վիճակի («ի պաշտօն ծառայութեան հայոց»)՝ ինչ գործում որ հարկաւոր կը լինեն հայերին»¹⁰⁵: Օրէնքը թոյլատրում է հայ գերիներին փոխանակել օտարազգի գերիների հետ: Հակառակ դէպքում՝ խաղաղութեան դաշինք կնքելիս պէտք է թշնամուն հարկադրել վճարել մեր գերի ընկածների գինը: Դաշինքի համաձայն՝ գերիներն ազատ են մնալ կամ հեռանալ Հայաստանից:

Արգելուում է օտար կանանց գերեվարումը. «Թէ՛ պատերազմի, թէ՛ խաղաղութեան ժամանակ իգական սենի իւրաքանչիւր անձ ազատ է գերութիւնից» եւ չի ենթարկուում բռնութեան: Եթէ թշնամի երկրի կանայք կամովի «խառնակուում են» հայ զինուորների հետ՝ մէկ արծաթ դահեկան վարձով, վերջիններս չեն պատժուում: Բայց եթէ զինուորականը «...րոնութեամբ է խառնակուում թշնամու կնոջ կամ աղջկայ հետ... դատուում է ըստ Հայոց օրէնքների»¹⁰⁶: Շահամիրեանը կարեւորում է կանանց պաշտպանութիւնը, ինչը «...խորթ է բարբարոսներին՝ նկատի ունենալով նրանց բռնի սովորութիւնները»: Նա յոյս ունէր, որ «...Հայոց ազգը մեր թշնամիներից սիրոյ եւ պատուի կ'արժանանայ»¹⁰⁷, բայց, ցաւօք, ե՛ւ պատմութիւնը, ե՛ւ ներկան այլ իրողութիւններ են վկայում հայոց թշնամիների բռնութիւնների վերաբերեալ:

Շահամիրեանը հայ խաղաղ բնակչութեան գերեվարութեան խնդիրը լուծում է հետեւեալ կերպ. ովքեր տեղահանուել են իրենց բնակավայրերից, եւ աւարառուել է նրանց ունեցուածքը, հա-

104 Անդ, յօդ. 489, 180:

105 Անդ, յօդ. 317, 140:

106 Անդ, յօդ. 490, 180:

107 Անդ, յօդ. 319, 140:

յոց գորքը պարտաւոր է հետապնդել թշնամուն՝ ստիպելով վերադարձնել «...մեր գերիներին՝ ունեցուածքով հանդերձ, աւելացրած՝ նոյնքան մարդ իր բնակիչներից եւ նոյնքան ունեցուածք [իր երկրից]՝ որպէս իր անօրէն վարմունքի տոյժ»¹⁰⁸: *Փաստորէն՝ թշնամուց իրաւամբ ուզմատուգանք է պահանջւում խաղաղ բնակչութեանը տեղահանելու եւ նրա գոյքը բռնագրաւելու դէպքերում, ընդ որում՝ այն ժողովրդի համար, որ ոչ միայն զէնք չի գործածել ու ընդդիմացել, այլեւ բարեխնդօրէն վճարել է հարկերը:*

*Սահմանադրութեան նախագծում սահմանուած է նաեւ թշշնամու տարածքում ձեռք բերուած աւարի բաժանման կարգը: Հստ օրէնքի՝ թանկարժէք մետաղները (ոսկի արծաթ), քարերը, զարդերը, անասունները, խմիչքը եւ այլն, վաճառուում են աճուրդով, եւ գումարը բաժանուում է նախարարի, զօրապետների ու զինուորների միջնեւ*¹⁰⁹: *Պատերազմում հիւանդացած կամ զոհուած զինուորը (կամ նրա ընտանիքը) «...ձեռք բերուած աւարից ստանում է ողջ եւ առողջ զինուորականին հաւասար բաժին»¹¹⁰: Հստ օրէնքի՝ զոհուածներին հասնող աւարի բաժինը նախ տրուում է «...զոհուածի ժառանգներին, եթէ ժառանգներ չունի՝ մերձաւոր ազգականներին»¹¹¹: Ակնյայտ է, որ զինուորական օրէնքներում, ինչպէսեւ իրաւունքի միւս ճիւղերում, Շահամիրեանը կարեւորում է օրէնքների համապատասխանութիւնը մարդու բնութեանը:*

Օրէնսդէտը նախագծում քննարկում է պետութեան հարկային, մաքսային քաղաքականութիւնը՝ պետական հարկեր սահմանելով շահութաքեր ցանկացած գործունէութեան պարագայում: «Քանի որ Հայոց պետութիւնը բանակով պաշտպանում է Հայոց աշխարհը, ապահովում է Հայոց ազգի ազատութիւնը... հատուցում է թշնամու կողմից կողոպտուած ունեցուածքը... զերծ պահում Հայոց աշխարհը եւ ողջ ժողովրդին այլազգիների գերութեան լծից եւ պահում իր բարեխնամ հովանու ներքոյ... ուստի՝ այս ամէնի համար Հայաստանի ազգաքանչութիւնը պարտաւորուածութիւն է կրում... հատուցել մեր պետութեանը՝ հարկ, մաքս, հաս, բաժին ու հնագանդութիւն ցուցաբերել մեր սահմանադրութեան հանդէա»: Տարեկան ստացուող բոլոր եկամուտներից, բարիքներից ու պարգեւներից բնակիչները պարտաւոր են տասանորդ վճարել Հայոց պետութեանը, եւ «...տրուող հար-

108 Անդ, յօդ. 388, 162:

109 Անդ, յօդ. 311, 138:

110 Անդ, յօդ. 312, 139:

111 Անդ, յօդ. 314, 139:

կը մեր օրինական եւ իրաւական պարտքն է»¹¹²: **Այդպէս՝ հարկային քաղաքականութիւնը միտուած էր ապագայ Հայաստանի Հանրապետութեան արտաքին անվտանգութեան պահպանմանն ու հասարակութեան բարօրութեան հաստատմանը:**

Սահմանադրութեան մէջ սահմանուած է մաքս՝ Հայաստան ներմուծուող կամ օտար երկրներ արտահանուող ապրանքների համար: Ընդ որում՝ Հայաստան ներմուծուող գէնքի եւ զինամթերքի համար հարկ եւ մաքս չի գանձւում. «Ամենայն գէն եւ գործիք պատերազմի մտցէ առ աշխարհն հայոց ազատ լիցի հարկից եւ մաքսից»¹¹³: Այս յօդուածն արտացոլում է Հայոց բանակի վերազինման խնդրով շահագրդիու Շահամիրեանի քաղաքական նպատակը՝ խրախուսելու գէնքի ու զինամթերքի ներմուծման ազատութիւնը: Նա նաեւ սահմանել է օրէնք որոշ ապրանքների արտահանման արգելքի մասին: Ըստ դրա՝ «Ամեն մարդ ազատ է իր արտադրած ապրանքներն առեւտրական նպատակներով արտահանել օտար աշխարհ, բացի գէնքից եւ գործիքներից... ոսկեայ եւ արծարեայ իրերից ու զինամթերքից, որոնք խստի արգելուած են (ընդգծումը.-Լ.Ս.Ճ)¹¹⁴: Մէկ այլ յօդուածում շեշտում է հէնց ռազմական իրավիճակում գործող արգելքը. «Պատերազմի ժամանակ արգելում է Հայոց երկրից թշնամու տուն եւ երկիր, կամ բանակ՝ սնունդ, ոսկի, արծար, գէնք ու զինամթերք տանելը»: Իսկ ով փորձի գաղտնի արտահանել, յանցանքը բացայացուելուց յետոյ ապրանքը բռնագրաւում է, եւ յանցաւորը «...բանտարկուում ու իր յանցանքի ծանրութեանն արժանի պատիժ է կրում՝ ըստ դատավճոի»¹¹⁵:

Ինչպէս Հայոց Դատաստանագրքերը, Սահմանադրութեան նախագիծը եւս բովանդակում է քրէական իրաւականուններ, որոնցում դատապարտում են պետական իշխանութեան եւ Սահմանադրութեան դէմ ուղղուած իրաւախախտումները: Անկախ պաշտօնից՝ եթէ վարչական կամ զինուորական որեւէ պաշտօնեայ ըմբռստանում է «Հայոց Տան եւ օրէնքների դէմ, մահապատժի և ենթարկում՝ համախոհներով հանդերձ»¹¹⁶: Ընդ որում՝ նրանց ժառանգներին (մինչեւ եօթներորդ սերունդ) արգելում է պաշտօ-

112 Անդ, յօդ. 410, 167-168, յօդ. 345-347, 147-148, յօդ. 403-407, 166-167, յօդ. 412-416, 168-169:

113 Անդ, յօդ. 190, 116:

114 Անդ, յօդ. 152, 109:

115 Անդ, յօդ. 493, 180-181:

116 Անդ, յօդ. 484, 179: Յօդ. 171-172, 113-114:

նավարել կառավարութեան մէջ եւ բանակում: Դաւաճաններն ու թշնամու լրտեսները մահապատժի են ենթարկում: Պարգեւատրութեան մասին: Իսկ եթէ որեւէ մէկը «...խարերայութեամբ եւ նախանձից դրդուած է զրպարտում արդար մարդուն՝ պատիժ է ստանում»¹¹⁷: Արգելում է այն հրամանների կատարումը, որոնք ուղղուած են Հայոց պետութեան դէմ:

«Որոգայթ փառացի» գաղափարադրոյթներին առնչում է 1777-1779 Շահամիլը Շահամիլեանի կազմած Հայ-ուսական դաշնագրի նախագիծը¹¹⁸: Ըստ դրա՝ Հայաստանը հոչակում է ինքնուրոյն ժողովրդավարական հանրապետութիւն, եւ այն պէտք է կառավարուի ազգային օրէնքներով: «Նախարարութիւն Հայաստանեայց լիցի հրովարտակաւ՝ ի տանէ Հայոց ըստ օրինացն Հայաստանեայց»¹¹⁹: Հայոց պետութիւնը պէտք է ղեկավարի բարձրագոյն օրէնսդիր մարմինը՝ Հայոց սունը, որ ուսական կայսրութիւնը պարտաւոր է ճանաչել «իբրև զբագաւորն Հայաստանեայց»¹²⁰, այսինքն՝ որպէս Հայաստանի գերագոյն իշխանութիւն:

Ըստ նախագծի՝ թէեւ Հայաստանը, որպէս Հայ-ուսական դաշնագրի կողմ, ինքնուրոյն պետութիւն է իր վարչատարածքային կառուցով, պետական մարմիններով, այնուամենայնիւ՝ դաշնագրում սահմանափակուած է Հայկական պետութեան ինքնիշխանութիւնը: Հայոց երկրի եւ ազգի անվտանգութիւնը պահպանելու նպատակով 20 տարի ժամկէտով Հայաստանի տարածքում պէտք է մնային ուսական զօրքերը՝ թուով վեց հազար մարդ: «2000 ձիաւոր, 2000 հետեւակի եւ 2000 թնդանօթածիգ»¹²¹: Այդ զօրքերը պահելու համար Հայոց տունը կայսրութեանը տարեկան պէտք է վճարէր «60000 թուման», ըստ որում՝ այդ գումարի կէսը վճարուելու էր ոսկով ու արծաթով, իսկ կէսը՝ բնամթերքով «հաց, միս եւ գինի»¹²²: Բոլոր ամրոցները եւ զօրքը պէտք է լինէին «...ի ներքոյ հրամանի սպարապետին ուսաց, մինչեւ ելանել նո-

117 Անդ, յօդ. 120, 103:

118 ԱՂՍԱՆԵԱՆՑ, Գ., Դիւան Հայոց պատմութեան, Գիրք Դ., Թիֆլիս 1899, Յաւելուած Ա., յօդ. Ա.-ի., 734-738:

119 Անդ, յօդ. Ա.:

120 Անդ, յօդ. Ժ.:

121 Անդ, յօդ. Գ.:

122 Անդ, յօդ. է.:

ցա ի Հայաստան աշխարհէ»¹²³: **Շահամիրեանը նախատեսում էր ռուսական զօրքի աստիճանական վերադարձ Ռուսաստան. 10 տարի անց Հայաստանից պէտք է դուրս բերուէր զօրքի 1/3ը, 15 տարի անց՝ միւս 1/3 մասը, 20 տարի անց՝ ռուսական մնացած բոլոր զօրամիաւորումները:** Ընդ որում՝ պէտք է նուազեցուէր զօրքի համար վճարուելիք տարեկան գումարը¹²⁴:

Նախագծում սահմանուած են Ռուսաստանի նկատմամբ հայոց՝ իբրեւ երախտապարտ ազգի պարտականութիւնները. օրինակ՝ եթէ ռուսական կայսրը հրամայի զինուորագրել հայերին, Հայոց տունը պարտաւորուում է տալ մինչեւ վեց հազար զինուոր եւ «...ստանալ ծախս նոցա ի կայսրութենէ»¹²⁵, ինչպէս Հայաստանն էր հոգալու ռուսական զօրքի ծախսը՝ ըստ է. յօդուածի: Ուշագրաւ է, որ դաշնագրում յիշատակուում է Հայոց, վրաց եւ աղուանից ժողովուրդների վաղեմի բարեկամութիւնը: Ու քանի որ ռուսական կայսեր պահանջով Հայոց տունն անհրաժեշտութեան դէպքում տրամադրելու է 6000 հայ զինուոր, ապա հայերը «...ունիցին եւս ազատութիւն օգնական լինելոյ Աղուանից եւ Վրաց որքան կարող լինիցին»¹²⁶:

Դաշնագրում սահմանուած են Հայաստանի եւ Ռուսաստանի ռազմական փոխյարաքերութիւնները: Հայոց տունը պէտք է Ռուսական կայսրութիւնը ճանաչի որպէս հայերին գերութիւնից ազատող՝ մնալով բարեկամ կայսեր բարեկամներին եւ թշնամի՝ նրա թշնամիններին: Համապատասխանաբար՝ կայսրը նոյնպէս պէտք է «...սիրեսցէ զրաբեկամս եւ ատեսցէ զրշնամիս հայոց»¹²⁷: Հայ եւ ռուս զինուորներն ու աստիճանաւորները պէտք է պատուեն Հայաստանում եւ Ռուսաստանում: Երկու ազգերը պէտք է յարգեն միմեանց ազգային սովորութիւններն ու հաւատը՝ «...ըստ սովորութեան իւրեանց յեկեղեցւոց»¹²⁸: Եթէ Հայաստանի եւ Ռուսաստանի միջեւ ծագեն խնդիրներ, վէճեր կամ տարածայնութիւն, դրանք պէտք է քննարկուեն «Հռոմի», այսինքն՝ Գերմանիայի միապետի գլխաւորութեամբ, որպէսզի արդար վճիռ կայացուի երկու կողմի համար, եւ «...խոռվութիւնն ու վրէժինդրութիւնն փակեալ»¹²⁹:

123 Անդ, յօդ. Դ.:

124 Անդ, յօդ. Զ.:

125 Անդ, յօդ. Ժ.:

126 Անդ, յօդ. ԺԷ.:

127 Անդ, յօդ. Թ.:

128 Անդ, յօդ. ԺԲ.:

129 Անդ, յօդ. Ի.:

Շ. Շահամիրեանը յոյս ունէր Հայ-ռուսական դաշնագրի միջոցով վերականգնել հայոց պետականութիւնը, բայց, ինչպէս վկայում է պատմութիւնը, Ռուսաստանի օգնութեամբ Հայկական պետութեան վերաստեղծումն անհնար էր: Առաւել արժէքաւոր էր «Հայաստանի Սահմանադրութեան նախագիծը», որ թէեւ գործնականում չիրագործուեց Հայաստանում, սակայն այն իր փիլիսոփայական-սահմանադրական գաղափարակարգով մեծ ազդեցութիւն ունեցաւ հայ հասարակական-քաղաքական եւ իրաւական մտքի զարգացման վրայ:

Այդպէս, ամփոփելով վերոյիշեալ մտածողների հայեցակէտերը եւ սահմանուած օրէնքները՝ յանդում ենք հետեւեալ եզրակացութիւնների:

Հայ իրաւագէտների զինուորական օրէնսդրական գործունէութեան հիմքում Հայաստանի ինքնիշխանութեան, ազգային անվտանգութեան, մարդու իրաւունքների եւ ազգային շահերի պաշտպանութեան գաղափարներն էին, որոնց իրականացումը ենթադրում էր ներազգային ուժերի համախմբում, կազմալուծուած զինուած ուժերի միաւորում, ազգային կանոնաւոր բանակի ստեղծում:

Ելնելով վերոյիշեալ ինդիրների լուծման հրամայականից՝ հայ օրէնսգէտները ստեղծեցին եւ օտար օրէնսդրքերից թարգմանաբար վերախմբագրեցին զինուորական օրէնքներ, որոնցում սահմանուած են զինուորական ծառայութեան կարգը, զօրամիաւորումների տեսակները, զինծառայողների իրաւունքներն ու պարտականութիւնները, պատերազմի եւ խաղաղութեան հիմնահարցերը, գերեվարութեան կարգը, խաղաղ բնակչութեան անձնական եւ գոյքային իրաւունքների պաշտպանութիւնը եւ այլն:

Օրէնսդրքերում առկայ քրիակարաւական կանոններում դատապարտում են զինուորների օրինախախտումները (դաւաճանութիւն, լրտեսութիւն, զինուորական գաղտնիքի հրապարակում, զինծառայութիւնից խուսափում, զէնքի ու զինամթերքի արտահանում, անբարոյ արարքներ եւ այլն): Նախատեսուած են պատիժներ՝ կատարուած յանցագործութիւններին համապատասխան: Գերագոյն պատիժ է սահմանուած պետութեան ու ազդի անվտանգութեանը սպառնացող զինուորական յանցագործութիւնների համար: Օրէնքներում հաստատում է նաեւ պատիժների բարոյադաստիարակչական նշանակութիւնը:

Հայ օրէնսգէտները կարեւորում էին ոչ միայն զինուորական դասի ու ազմական ունակութիւնները, այլեւ մարդկային որակնե-

ըստ՝ կոչ անելով գերծ մնալ բռնութիւններից ոչ միայն հայերի, այլեւ գրաւեալ տարածքների խաղաղ ազգաբնակչութեան ու գերիների նկատմամբ:

Զինուորական խրատականուններն ու օրէնքները նպաստել են հայկական բանակի կայացմանը, հայոց պետութեան ինքնիշխանութեան ամրապնդմանը, ազգային անվտանգութեան ապահովմանը, ներքին կարգուկանոնի հաստատման ու բարոյական դաստիարակութեան ծաւալմանը:

ԼԻԼԻԹ ՍԱՐՎԱԶԵԱՆ

Summary

MILITARY LEGISLATIVE CULTURE IN SOURCES ON ARMENIAN LAW

LILIT SARVAZYAN

This study analyses military laws determined by Mkhitar Gosh, Smbat the Constable, Nerses Shnorhali, Nerses of Lambron, and Shahamir Shahamiryan. Their legislative activity tends towards realising goals of Armenian sovereignty, national security, human rights, and national interests. Military laws establish the order of military service, types of military troops, the rights and obligations of military personnel, issues of war and peace, regulations of captivity, and the protection of individual and property rights of peaceful civilians. The codes contain a number of criminal and legal norms which condemn the violation of laws by military personnel, and the corresponding punishments determined for such transgressions. Armenian legislators highlight not only the capacities of various military rank, but also their human qualities. They call for avoiding violence not only against Armenians, but also against peaceful populations and hostages of occupied territories. Military laws have contributed to the reinforcement of the Armenian army, the strengthening of the sovereignty of the Armenian state, the defense of national security, the establishment of domestic order, and the expansion of moral education.